


BAEBELE, MOKAPO YA MINEI

 . . . ezali koyeba mingi koleka na ntina na Nkolo na biso mopambolami. Mpe yango nde ntina to—tosangana awa, ezali mpo na ntina wana, mpe, sikawa, mpe mpo na kobondela mpo na bana na Nzambe oyo bazali kobela. Mpe na ntongo ya lelo, tozalaki na lipamboli ya—ya malamumu mingi uta na Makomi.

² Tozali komeka kozwa, mbala nyonso oyo tozali koyangana, eteni ya . . . Nazoteya malakisi na Buku ya Baebele, ekokisi mposo mibale to misato sikawa. Mpe sikawa, soki Nkolo alingi, tokokóba mokolo ya Misato na mpokwa, na nsima mokolo ya Lomingo na ntongo mpe mokolo ya Lomingo na mpokwa, tokokóba, na ntango nyonso oyo nakozala awa mbala oyo. Ezali mayangani ya kolamuka te, kasi ezali kolamuka, mayangani na biso ya momesano, ya mpokwa na mpokwa. Na bongo tozali mpenza, mpenza na esengo ya kozwa ntango oyo mpo na kokutana na baninga na biso ya malamumu, ya bingumba ya zingazinga, mpe ya zingazinga na Falls City awa. Mpe soki—soki esalemi ete tókata yango to eloko moko, ekoki kozala ete Nkolo azali ntango mosusu kokamba biso, kala mingi te, na . . . ntango mosusu tokoki kolekisa mwa ba-mpokwa, ntango mosusu, na esika basalaka masano to esika moko, nsima na ntango moke, soki emonani lokola ete Nkolo akambi biso na nzela wana, na esika oyo tokoki kosangisa bato na biso.

Mpe tomonaki ndenge bato bazalaki koya, kozonga, koloba: “Esika ya—ya kokóta ezalaki te.” Ya solo, tabernacle ezali mpenza moke mingi. Ezali mpenza na bisika moke ya kofandisa bato, mpe tozali na esengo mingi ndenge bosepeli koya kofanda na molungé, mpo na koyoka Liloba na Nkolo. Mpe tozali kobondela ete Nzambe ápambola bino mingi mpenza mpe ásungá bino.

³ Mpe sikoyo, na mpokwa oyo, tolingi, tokobanda na mokapo ya 4 . . . Bato boni bazalaki awa na ntongo ya lelo? Bótombola maboko. Oh, ezali malamumu mingi, penepene bino nyonso. Mpe tokómi na, kobanda na, mokapo ya 4 ya Buku ya Baebele. Oh, oyo mpenza Buku moko malamumu! Bozali kosepela na Yango? [Losambo balobi: “Amen.”—Mok.] Mpe ezali likambo ya kokokanisa Likomi na Likomi.

⁴ Mpe Paulo, liboso ete átatola na ntina na likambo abikelaki, asengelaki liboso kokende na Arabia mpe koyeba, na nzela na Liloba, soki ezalaki Solo. Nalingaka yango. Mpe liteya ya ntongo ya lelo, tomonaki, na malakisi na ntongo ya lelo, ete Klisto azali motindo moko lobi, lelo mpe libela. Mpe Paulo amonaki ete Likonzi na Móto moko oyo ekambaki bana ya Yisraele, nde ekutanaki na ye na nzela ya Damaseke. Tomonaki ete Likonzi na

Móto, oyo ekambaki bana ya Yisraele libanda na lisobe, kino na mboka ya elaka, ekutanaki na Paulo na nzela ya Damaseke, mpe Amibengaki “Yesu”.

⁵ Na nsima tomonaki mpenza Bonzambe oyo eleki monene ya Yesu Klisto. Buku mobimba oyo ezali bobele emoniseli ya Yesu Klisto. Mpe Ayaki, tomonaki ete: “Na ntango ya kala mpe na mitindo ndenge na ndenge, Nzambe asololaki na batata na nzela na basakoli; na mikolo oyo ya nsuka, na nzela na Mwana na Ye, Klisto Yesu, Amimonisi Ye moko.” Mpe Buku yango, banda Genese kino Emoniseli, ezali eloko moko te bobele emoniseli, ya seko, ya Nkolo Yesu, ntango nyonso.

⁶ Mpe tomonaki ete Ye nde Azalaki kati na nzete ya kopela móto. Tomonaki ete Azalaki Ye oyo azalaki elongo na Nzambe, liboso na kozalisama ya mokili. Mpe tomonaki ete, na Kondimana na Sika, Azalaki Nzambe mpe Moto, elongo. Na nsima, ntango Atikaki Kondimana na Sika, mpo na kokende na Likoló, Alobaki: “Nautaki na Nzambe, mpe Nazongi na Nzambe.”

⁷ Na bongo, ntango Paulo akutanaki na Ye, Azalaki na lolenge oyo Azalaki na yango ntango Akambaki Yisraele, Likonzi na Móto. Mpe Paulo atalaki Ye na miso, wana abongwanaki naino te, mpe esalaki ete akóma na mpasi ya miso na mikolo na ye nyonso oyo etikalaki. Akufaki miso, mpe na mikolo ebele, azalaki komona ata eloko moko te. Basengelaki kokamba ye na balabala moko, na nkombo Alimá.

⁸ Mpe Nzambe azalaki na mosakoli moko kuna, oyo Asololaki na ye, na nkombo Anania, oyo ayaki, na nzela na emononeli, atielaki Paulo maboko, mpe alobaki: “Ndeko Saulo, banda komona.”

⁹ Mpe tomonaki, na nsima, ete Molimo Mosanto wana moko, Nkolo Yesu moko wana, ayaki epai na Petelo na lolenge ya Pole mpe akangolaki ye na boloko.

¹⁰ Mpe tomonaki ete bobele Nkolo Yesu moko wana, na mikolo oyo, azali kino lelo kati na Likonzi na Móto yango (Pole), oyo ezali kokamba bato na Ye (Lingomba na Ye), kosaláká likambo yango moko, kopesáká bimononeli; koya kotielá bato maboko, na nzela na emononeli. Nkolo Yesu, oyo akutanaki na ngai na ndako mokolo ya Lomingo eleki, mpe alobaki ete mobali moko azalaki koya, azali na nsuki ya moíndo, ebandi kokóma mpembe. Ete azali Greki. Mwasi na ye akómi mwa mokóló, mpe akozala kolela na etumbelo.

¹¹ Bamosusu kati na bango balobelaki yango, mpe bayebaki ete ezalaki kokokisama. Azalaki motengumi, mo—mosisá ya motó, oyo esalaka ete moto átelema ngwi, esilaki kobeba. Azalaki ata kokoka kokamba makolo na ye te, to binámá na ye. Mpe azalaki mokufi miso. Mpe mpo na kotalisa yango polele mbala mibale: nabengisaki liboso mama moke moko mpo aya kobondela mpo

na babeli, na nsima na mbala moko nabengisaki Ndeko Thom mpo aya kobondela. Mpe biso, tofandaki awa, tozalaki kolandela yango. Na bongo nakitaki mpe nabondelaki mpo na babeli, mpe nazongaki. Mpe mwasi yango ayaki, kokokana na emononeli mpenza, mpe asimbaki ngai na loboko mpe abandaki kolela, mpe alobaki ete Dr. Akerman moto atindaki bango awa. Dr. Akerman azali moninga na ngai mpenza, Mokatoliko. Mwana na ye ya mobali azali sánzó na Monastére na—na Saint Meinard, kuna na Indiana. Mpe mobali yango azalaki moto ya Jasper. Mpe Nkolo abikisaki ye, na kiti wana. Atelemaki mpe atambolaki. Akómaki komona malamú lokola moto nyonso. Mpe abimaki na ndako oyo, malamú mpe mobimba. Nyoso wana na nzela ya emononeli!

12 “Ndeko Saulo, Nkolo Yesu oyo abimelaki yo na nzela, atindi ngai mpo nákoka kotiela yo maboko, mpo ókoka komóna lisusu mpe ótonda na Molimo Mosanto.” Kitoko mingi.

13 “Bongo, tomoni, lokola tozali na lobiko monene oyo, tosengelaki te. . . Tokokaki kokima bitumbu mpe nkanda ya Nzambe te, soko tozangi kotia motema na lobiko monene boye.”

14 Sikoyo tokobanda kotanga, na mpokwa oyo, na, kobanda na mokapo ya 4 ya Buku ya Baebelé. Soko moto alingi kolanda litángi elongo, tozali na mwa ba-Biblia awa. Soki balingi moko na yango, boye, moko na basungi akoyela yo yango, soki otiki loboko na yo ya kotelema likoló, ba—ba-Biblia oyo. Soki moko na bandeko oyo akolinga kozwa. . . Biblia ezali mibale wana, nabanzi.

15 Mpe sikoyo tokosala noki, mpo tozali na elambo nsima ya mwa ntango. Mpe esika tokosuka na mpokwa oyo, mokolo ya Misato na mpokwa, tokobanda lisusu. Sikoyo, Nabanzi, na ntongo ya lelo, ná litangi na biso, tobandaki na molongo ya 15.

16 Ntango mosusu moto moko ayebaki te ete nakómi kolata maneti, mpo na kotanga. Nabandi kokóma mobange. Mpe nakoki naino kotanga, kasi nakoki kokende noki noki te, mingi mpenza soki nazali na nkómá ya mike awa, soki ekomami mike.

17 Mpe nakendeki epai ya monganga mpo na kotalisa miso na ngai, koyeba soki miso na ngai ebandi kobeba. Miso na ngai ezalaki zomi-zomi. Alobaki: “Kasi osili kolekisa mibu ntuku minei, mwana.” Atangisaki ngai eloko moko, alobaki: “Banda kotanga.” Natangaki yango. Mpe nakobaki kopusana penepene, ekomaki malembe mpe malembe. Mpe ekómaki pene *boye*, nasukaki. Na sima atiaki oyo ya zomi-zomi kuna, nakokaki kotanga yango na bisika nyonso. Kasi alobaki: “Likambo ezali ete, soki moto alekisi mibu ntuku minei, mbuma ya miso na yo ekomaka papala.”

18 Sikawa, nakoki kofina miso na ngai mpo na kotanga mpenza pene na ngai *boye*, kasi osengeli kofina miso. Na bongo, asalelaki ngai talatala ya miso. Nakoki komona yango, bipai nyonso, soki ezali mpenza pene na ngai. Sasaipi, soki ekei mosika na ngai,

nakoki mpenza komona te, na biloko oyo. Kasi nazali kotanga yango, kotanga yango ná maneti.

¹⁹ Sikawa, na ntongo oyo, tomonaki eteni ya nsuka ya mokapo ya 3 ya Baebete. Mpe, oh, tomonaki biloko mpenza ya motuya! Sikoyo bóyoka, nalingi kotanga lisusu, mpo tózwa mobóko sasaipi. Tokolobela yango te, kasi tokozongela yango mwa moke kaka.

Na ntango elobami ete, Lelo oyo soko bo...koyoka mongóno na ye, boyeisa mitema na bino makasi te lokola na ntango ya kotomboka.

Mpo bamosusu, bango, bayokaki Liloba, ntango bayokaki Liloba, batombokaki: nzokande ezali te nyonso oyo babimaki na Ejipito na nzela na Mose.

²⁰ Sikawa, na yango, na ntongo ya lelo, tomoni ete Alobaki: “Bóyeisa motema na bino makasi te sikawa, lokola na mikolo ya kotomboka.” Ezali ntango bapesaki Nzambe nkandá, mpo Asilaki kopesa bango Mose, mosakoli na Ye, mpe elembo oyo ezalaki elongo ná Mose. Bato boni, na kelasi ya mpokwa oyo, bayebi soko elembo yango ezalaki nini? Likonzi na Móto, Baebete 13.

²¹ Sikawa, toyebi te soki eyanganelo bamonaki elembo yango to te. Kasi Mose amonaki Yango, mpo Mose asilaki komona Ye na mwa nzete ya kopela na móto. Azalaki Móto. Mpe bana ya Yisraele batosaki Mose, mpe balongwaki na Ejipito. Mpe kaka ntango babimaki na Ezipito, tomonaki ete, Nzambe akambaki bango kino na motambu moko. Epai wapi mapinga ya Falo ezalaki nsima na bango, Mbú Motane na ngambo nyonso mibale, mpe Nzambe atiaki bango na momékano; mpe babangaki. Mpe epesaki Nzambe nkanda. Alobaki: “Mpo na nini ozali koganga epai na ngai?” Alobaki: “Loba kaka mpe kende liboso.” Nasepeli na yango.

²² Sikoyo, bazalaki kolanda Mose, ndenge Mose azalaki kolanda Likonzi mpe Lipata, mpe bazalaki na nzela kokende na mboka ya elaka. Elilingi kitoko ya Lingomba, na mpokwa oyo, tozali kokende na mboka ya elaka, tokambami na Molimo yango moko, bilembo mpe bikamwa yango moko, ndenge Nzambe alobaki.

²³ Sikoyo bójala. Na nsima, bakómaki na Lisobe ya Lisumu. Ma—mai ezalaki “bololo,” *Mala*. Mpo na nini Nzambe akambaki bango na mai ya bololo? Ezali komonana lokola ete Akokaki kokamba bango na mai ya malamú. Kasi Akambaki bango na mai ya bololo mpo Ámeká kondima na bango. Alingaka kosala bongo. Alingaka kotika minioko ékómela bino, kotalisa ete Akoki kotalisa bino bolingo na Ye mpe nguya na Ye. Ndenge nini bato, lelo, oyo bandimaka te ete Nzambe asalaka bikamwa, ntango minioko eyaka, batikaka mpe bakendeke na bango? Kasi

biso tondimaka ete “Nzambe asalaka bikamwa.” Akoki te... Nzambe azali na...

²⁴ Bóyoka likambo oyo. Soki Nzambe akosala ndenge moko te, ntango makambo ndenge moko eyaka, na boye Nzambe amemi ngambo mpo na kopona bato na Ye. Bonsómi ya Nzambe esengaka ete Ásala na likambo moko na moko ndenge asalaki na likambo ya liboso, soko te, Azalaki na libunga ntango Asalaki mbala ya liboso. Soko Nzambe asali na lolenge oyo Asalaki na likambo ya liboso te, soki Asali ndenge mosusu na likambo ya mibale, na bongo Asalaki libunga ntango Asalaki mbala ya liboso. Soko Nzambe abikisaki babeli na Kondimana na Kala, Asengeli kosala yango na Kondimana na Sika mpe lelo, soko te, Asalaki libunga ntango Abikisaki bango kuna. Asengeli kosala ndenge moko, mbala nyonso. Mpe Akosala yango, ntango kondima moko wana ekokutana na lolenge ya makambo yango. Libunga ezalaka epai na biso, epai na Nzambe te. Mpo tomonaka Ye epai ya bato mosusu, mingi, kosala bikamwa minene ya kafukafu. Toyebi yango. Motioli akoki te koloba: “Ezali bongo te.” Mpamba te tomonaka Yango kotalisama polele, mpe yango wana.

²⁵ Bazaláká koloba: “Lakisa ngai ekamwiseli.” Bakoki lisusu koloba bongo te. Science ekoki lisusu koloba bongo te. Tokoki mpenza kotalisa yango polele na mokili ya science. Mpe mokili ya science etátolaki ete Ezali moko ya kokamwa, na lolenge ya Likonzi na Móto, azali elongo na biso. Fotó na Ye yango oyo, awa mpenza, mpe mosusu ezali na Washington, DC, na mpokwa oyo. Ezali Klisto yango moko.

²⁶ Na ntina wana, kala, bandeko na ngai batei bazalaki koyebisa ngai: “Oh, Ndeko Branham, wana ezali zabolo. Kokota na likambo wana te.” Bakómaki kobangisa ngai.

²⁷ Mpe nazalaki kolinga koteya yango te, kino ntango Nzambe ayaki komonisa yango, ete: “Azali Yesu yango moko, Ye moko.” Oh, na bongo komeka kolongola ngai yango? Ekoki kosalema te. Mpo, ezali Likomi. Ezali Liloba na Nzambe. Ezali kaka likambo moko boye te, oyo nabikelaki, oyo ezangi moboko. Ezali likambo oyo nabikelaki, oyo esimbami na Liloba na Nzambe mpe na elaka ya Seko, oyo epambolami na Nzambe.

²⁸ Sikoyo, tomoni awa ete, na bongo, ete Alobaki.

Mpo ete bamosusu wana eyokaki bango, batombokaki:...

Ya solo. Bazalaki kolemba nzoto, mbala nyonso oyo bazalaki kokóma na bisika momekano eyaka. Bongo bazalaki kosala nini? Bazalaki kotomboka, kolemba nzoto, na mposa ya kozonga nsima, mpe: “Mpo na nini likambo *boye* ekomeli ngai?”

²⁹ Likambo ya kokamwa, na ntongo ya lelo, nsima na ngai koteya yango na makasi na ngai nyonso, bato mingi bayaki na etumbelo mpe babetaki Yango ntembe, ete: “Mpo na nini

likambo oyo ekómeli ngai?” Bomoni ndenge Ezalaka? Elekaka likolo ya mitó ya bato. Bato bazalaka kaka ndenge moko.

³⁰ Yesu alobaki: “Bozali na miso, kasi bozali komona te.” Alobaki bongo epai ya bayekoli.

³¹ Balobaki: “Tala, sasaipi Ojali kosolola polele. Sapaipi tondimi. Moto moko te asengeli koyebisa Yo likambo, mpamba te Nzambe nde alakisi Yo yango.”

³² Alobaki: “Sikawa bondimi, nsima na ntango nyonso oyo?” Bomoni?

³³ Osengeli kobeta ntembe na likambo moko te, liboso na Nzambe. “Mpo ete matambe ya bayengebene ekambamaka na Nzambe.” Mpe komekama nyonso etiami likoló na bino, mpo na komeka bino. Mpe Biblia elobi: “Ezali na motuya monene mingi mpo na bino koleka wólo.” boye soki Nzambe atiki ete mwa mitungisi mike ékómela yo, bómikanisela, ezali mpo na kosembola yo. “Mwana nyonso oyo ayaka epai na Nzambe asengeli liboso kopesama etúmbu na Nzambe, mpe komekama, mwana yango azali koyekola.” Ata mwana moko te atiami pembeni. “Mwana nyonso oyo ayaka.” Mpe mitungisi yango esalemaka, epesamaka mpo na kotala soki okosala nini. Bomoni? Ezali Nzambe, na esika ya komekama oyo. Yango nde nyonso oyo mabelé ezali, ezali bisika ya komekama, epai Azali koluka kolekisa bino na mimekano.

³⁴ Sikawa bóyoka, wana tozali kokóba. Mpe nalingi kozwa eteni na yango ya nsuka.

Mpe epai na banani akataki ndai ete bakoingela kati na epemelo na ye te, . . .

Sikawa, wana nde esika oyo tozokóma, na mpokwa oyo.

. . . kati na epemelo na ye, kasi mpo na baoyo bandimaki te?

Boye, tomoni ete bakokaki koingela te. . . mpo na kozanga kondima.

³⁵ Sikawa, lisumu ezali nini? Kozanga kondima. Nzambe ayaki epai na bango, kati na Likonzi na Móto; atindaki mosakoli na Ye, mpe apakolaki ye, apesaki ye bilembo ya kosala liboso na bato. Na nsima, Likonzi na Móto, na nzela na mosakoli, ebimisaki bango. Likambo nyonso bazalaki kokutana na yango, babandaki koyima-yima mpe kolobela mwa mbeba nyonso oyo bazalaki komona kati na Mose, babandaki koluka koswanisa ye mpe koloba mabe mpo na ye. Mpe Nzambe asepelaki te, mpo Alobaki ete bazalaki kosumuka.

³⁶ Esengelaki nde báyoka. Kasi, na esika na yango, bayokelaki makanisi: “Ekoki kosalema ndenge nini? Ndenge nini makambo oyo ekoki kozala?” Soki Azali Nzambe, nyonso ekoki kosalema. Mpe Akosala ete nyonso etambola elongo mpo na bolamu ya baoyo balingi Ye.

³⁷ Sikawa tobandi koyekola likambo moko ya monene awa, ezali, na ntina na “Bopemi,” *sabata*. Sikawa, bazalaki baleki nzela kati na mobembo na bango. Bomoni? Basilaki kozala na Ezipito, mibu nkama minei, mpe na boómbo. Mpe sikawa bakómaki kobimisama na nzela na bikamwa ya Nzambe, kokokana na elaka na Ye. Mpe bazalaki kokende na mboka ya elaka. Mpe awa, Pole moko ya kokamwa emonani, katikati na bango, mpe ebandi kokamba bango.

³⁸ Sikawa, moto moko akokaki koloba: “Sikawa, botala awa, Mose oyo azali nani? Nani akómisi yo moyangeli na biso? Ozali moko na biso, boye te? Nani atii yo awa mpo ózala mokonzi na biso? Okanisi ete oyebi mingi koleka mobateli na biso? Okanisi ete oyebi mingi koleka sánzó? Okanisi ete ozali—ozali na mayele mingi koleka basambeli na biso, ya lelo?” Etalaki yango ata moke te.

Ezalaki Nzambe, kati na Likonzi na Móto, kotatoláká ete Azalaki kati na mobembo yango. Esalaki bokeseni moko te soki nani azalaki na boyebi mingi to nani azalaki na boyebi mingi te. Ezalaki nde likanisi ya kolanda oyo Nzambe atiaki liboso na bango.

³⁹ Ee, Mose, na ndenge ya nzoto, asalaki mbeba ntango amekaki kosikola bana na nzela na Liloba na Nzambe, komema etonga ya bato na lisobe. Nzokande azalaki na . . . Ee, azalaki mosangoli ya biloko nyonso oyo bazalaki na yango. Azalaki na mampinga nyonso oyo ezalaki na mokili mobimba. Mpe azalaki wana, general monene ya mampinga. Mpe likambo oyo ezalaki kolanda, asengelaki nde kozala mokonzi, Falo ya Ejipito. Boye akokaki kaka komata na ngwende, mpe koloba: “Malamu, bana, bozonga epai na bino.” Yango ekati likambo; azalaki Fálo. Kasi Mose . . .

⁴⁰ Oh, yango oyo. Mose, na *kondima*, amonaki elaka ya Nzambe. Mpe Mwanje na Nkolo ayaki epai na ye, mpe ayebaki Nzambe malamau, na minuti mitano Liboso na Mwanje yango, koleka oyo ayekolaki na mibu ntuku minei elongo na balakisi ya Ezipito. Ayebaki ete Azalaki. Amonaki bikamwa kosalema.

⁴¹ Alobaki: “Nakozala elongo ná yo, Mose. Nakokende liboso na yo.” Basosolaki. Mpe Apesaki ye bilembo ya kosala.

⁴² Sikawa, bazalaki kokende na mboka ya bopemi. Nzambe abongiselaki bango bopemi, esika oyo bakosengela te kozala . . . na bakapita likoló na bango, mpo na kotambuisa bango, kosalisa bango misala.

⁴³ Ezali mpenza etaliseli kitoko lelo, ntango totalaka lingomba mpe tomonaka lingomba na lolenge yango. Moto nyonso oyo abotami na Molimo na Nzambe atiolaka mokili, “Mpe soki bolingi mokili to biloko ya mokili, bolingo na Nzambe ezali ata kati na bino te.” Yango nde oyo Biblia elobi. Mpe moleki nzela nyonso, na mobembo na ye, ayinaka biloko ya mokili.

Ayinaka komona mibali komela masanga. Ayinaka komona mibali kobenda makaya. Ayinaka komona basi na balabala, balati mwa bilamba ya bosoto wana. Ayinaka komona masano ya loto mpe ya kalati.

⁴⁴ Mpe lobi, ntango Ndeko Tony. . . to Ndeko Wood ná ngai tozalaki koleka na balabala, ná bamosusu, mibali mosusu. . . Mwa madame moko, kuna na Louisville, azalaki kokita na balabala, elenge mwasi moko kitoko, alataki bilamba moko ya nsómo; ematá mwa moke likolo ya loketo, mpe akangaki mwa nsinga na loketo, na ngambo nyonso mibale, mpe mwa eteni ya elamba elíngámá liboso na ye, singa moko ekangaki yango na nsima. Azalaki kotambola na balabala, nsómo mpenza, mpe mibali nyonso na balabala bazalaki kotala ye. Nalobaki: “Azali koyeba te ete akweisami, na miso ya Nzambe, ete azali kosala ekobo na mibali nyonso oyo batalaki ye na lolenge wana. Mpe akoyanola na mokolo ya kosambisama, mpo asalaki ekobo na mibali yango.”

⁴⁵ Yesu alobaki: “Ye oyo akotala mwasi na mposa mabe na ye, asílí kosala ná ye ekobo.” Ezali solo.

⁴⁶ Boye, bomoni, Ndeko Wood alobaki na ngai: “Eloko nini esali yango, Ndeko Branham?”

⁴⁷ Nalobaki: “To motó na ye ezali kosala malamú te, to akonzami na molimo mabe.” Makambo mibale kaka nde ekoki kosala yango. Mwasi ya limemia mpe ya peto akoki kolata biloko wana te, loba bobele soki akonzami na zaboló. Ezali mpenza Solo.

⁴⁸ Sikawa, moleki nzela oyo azali kokende na Lola, abikaka kati na mosanda mosusu. Ozali na ntina ya komitungisa mpo na ye te mpo na kotala ye. Akobalola motó, soki azali na Nzambe na motema na ye, mpamba te azali kobika kati na mosanda ya molimo oyo ezali mosika mingi na makambo wana. Ezali solo. Okolinga kokweya na likambo ya ndenge wana te, na esambiselo. Boye akobalola motó na ye mpe akoloba: “Nzambe, yokela mwasi yango mawa,” mpe akobi na ye. Tozali kati na mobembo na biso. Tozali kokende na Mboka ya Kanana. Tozali kokende na Bopemi ya Seko, oyo epambolami, oyo Nzambe apesi biso. Mpe kati na mobembo yango, tozali komekama. Tozali komekama na makambo ndenge na ndenge, kasi atako tomekami tozangi kosala masumu.

⁴⁹ Sikawa botala, wana tozali kokende na mokapo ya 4: “Tika ete tóbanga.”

Tika ete tobanga, mpamba te, elaka oyo etikameli biso ya koingela na epemelo na ye, . . .

⁵⁰ Nalingi ete bóbosana te, ete, bobele koyeba, bobele soko Nzambe akomonisa biso yango! Ata soki tosambelaka ndenge nini, wana ezali na likambo moko te ya kosala ná yango. Nzambe asengeli koya na nzela na emoniseli mpe komimonisa Ye moko

epai na biso, yango ekobimisa biloko nyonso ya mokili. “Sikawa, wana elobami: ‘Lelo, soki bo . . .’”

51 Sasaipi tóbanda mo—mokapo ya 4.

Tika sasaipi tobanga, lokola, elaka etikameli biso ya koiingela na epemelo na ye, . . .

52 Sikawa bomikanisela, ntango bazalaki kokende na Bopemi, Likonzi na Mótó ekambaki bango. Sikawa, tolingi koyeba: “Bopemi yango ezali nini?”

Tika ete to . . . banga, na ntina ete, elaka yango etikameli biso ya koiingela na epemelo na ye, (botala), ete moko na bino amonana na kojanga te.

53 Sikawa, elaka yango oyo. Eloko tosengeli kobanga yango oyo: soki elaka moko etikali te mpo na biso. Kasi elaka ezali! Na bongo, eloko elandi, kozanga yango te.

54 Sikawa, likanisi ezali ete, soko tozali kokende na Epemelo, Epemelo yango ezali nini? Ezali wapi? Ezali nde kokota na lingomba? Ezali nde kobatisama na lolenge moko boye? Ezali nde kokóma mondimi ya lingomba ya monene koleka na engumba? Kolata bilamba ya kitoko koleka? Ezali nde koyekola? Ezali nde mbongo, mpo tókoka kotika mosala mpe kolala, kopema bomoi na biso mobimba oyo etikali, ndenge tobengaka yango? Ezali yango te.

55 Bóyoka oyo Biblia elobi ete yango ezali, mpe ndenge tokozwa yango.

Tika ete tozala na kobanga, na ntina ete, elaka etikameli biso ya koiingela na epemelo na ye, ete moko na bino amonana kozanga te.

Mpo ete epai na biso (na mokolo wana) nsango malamumu yango esilaki koteyama pelamoko epai na bango: . . .

Evangile ezali nini? Nsango ya malamumu. Nsango ya malamumu eyelaki bango na Ezipito, ete: “Nzambe atindi mosikoli, mpe Akobimisa biso mpe Akomema biso na mboka ya elaka.”

56 Nsango malamumu mpo na biso sikawa, ete: “Nzambe asili kotinda Mosikoli, Molimo Mosantu, mpe tozali kokende na Mboka ya elaka.” Sikawa bato bakomisi yango bindimeli mpe bibongiseli, kasi Nzambe azali kaka, ete *Bopemi* na biso ezali “Molimo Mosantu”.

57 Bótala.

. . . nsango malamumu esilaki koteyama . . . na bango pelamoko na biso: kasi liloba liteyamaki epesaki bango litomba te, li . . .

Bókanisa:

. . . liloba liteyamaki epesaki bango litomba te, mpo ejuani na kondima te kati na baoyo bayokaki yango.

58 Oh, bandeko na ngai, tika nátelema awa miniti moko. Etali te boni boni Liloba eteyami, malamumu ndenge nini osepelaka na ndenge Eteyami, soko yo moko ozali eteni na Yango te, Ekosungana yo ata moke te.

... ejuani na kondima te kati na nzela na baoyo bayokaki yango.

59 Bamonaki bikamwiseli ya Mose. Balobaki: “Ezali mpenza kitoko.” Mpe bapusanaki. Ba—bamonaki ye kosala bikamwiseli. Mpe bamonaki Likonzi na Móto, ntango mosusu, to bayokaki bango kolobela Yango. “Oh, ezali malamumu.”

60 Kasi esanganaki te ná kondima ya moto na moto. Mpamba te, bobele ntango bakómaki na lisobe, bango (moko na moko) babandaki koyima-yima. Mpe Nzambe alobaki: “Lokola batiaki ntembe, ezalaki lisumu.” Kotia ntembe na eloko moko te. Ndimu. Kotia ntembe te, ata soki bokono yango ezali makasi ndenge nini, ndimu Yango.

61 Sikoyo babandaki koyima-yima, mpe Nzambe abwakisaki bango. Na bongo, Akataki ndai, na nkanda na Ye, ete: “Basengeli koingela na Epemelo na Ye soko moke te.” Mpe Biblia elobi awa, nabanzi ete Ezali na—na mokapo ya 3, ete: “Bibembe na bango ekweyaki na lisobe.”

62 Mokapo ya 3 mpe molongo ya 17.

Kasi na baoyo ayokisamaki nkanda mpo na mibu ntuku minei? ezalaki te baoyo basalaki lisumu mpe bibembe na bango bikweaki na lisobe?

63 Mpe na baoyo nyonso babimaki na Ezipito, bobele bato mibalé nde bakotaki na mboka ya elaka. Na bato nyonso oyo bazalaki liboso na mpela, na mikolo misilaki koleka kala, milimo mwambe nde ebikaki, kati na ba-miliar. “Ekuke ezalí moke mpe nzela ezali nkaka, mpe bobele moke nde bakomona yango.”

64 Bato mosusu balobaka: “Bongo, Ndeko Branham, olobi nini mpo na bankóto oyo Biblia elobi ete bakomonana kuna?”

Bomikanisela naino bato boni basila kokufa na ekeke moko na moko, oyo bazalaki Baklisto, kati na bileko. Bango nyonso bakosekwa. Yango nde esali Nzoto yango. Ozelaka ete bato miliar nkama nde bakouta na Amerika oyo, to bamosusu, uta na mokili oyo lelo. Ntango mosusu bato ntuku mitano bakokoka te, oyo bakobima. Kasi Lingomba ya nkembo, oyo esikolami, elali kati na putulú, kozeláká. Bazali mabanga ya motuya ya Nzambe, oyo bazali kopema kati na putulú. Kasi bomoto na bango ya kati ezali na nse ya etumbelo ya Nzambe. Bazali na lolenge na bango oyo esengeli te. Bazali kati na nzoto moko, ya solo, kasi ezali theophanie. Mpe bazali kolela epai na Nzambe: “Kino ntango nini?” Bakoki komonana bamoko na bamosusu, kasi bakoki kopesana mbote ya maboko te, na nzoto ya lolenge wana.

65 Soki okutani na mama na yo na Nkembo na mpokwa oyo, soki osengeli kokende, okokoka kopesa ye mbote ya loboko te mpo azali na loboko ya ndenge wana te. Okoki koyoka yango te ndenge okoki koyoka sikawa. Mpamba te, biyokeli mitano nde etiami na nzoto oyo, mpo na kokonza yango. Bozali na ye ekoyokana kati na mosanda mosusu.

66 Ezali lokola mobali mpe mwasi. Mabála ekozala te, to kopesama na libala, na Lola. Mpo na nini? Mpo kuna ezali bolingo ya ndenge mosusu. Mposa ya koyebana nzoto ezali te. Makambo nyonso wana esili koleka. osili kopetolama mpe okomi peto.

Kasi obiká naino na lolenge wana te, na yango, okelámá mpo na lolenge wana te. Ozali kaka kozela kuna. Kasi ozali na mposa makasi ya kozonga na esika bokelámá lokola mobali mpe mwasi, mpe kuna, Nzambe akosekwisa nzoto yango longwa na putulu ya mabelé mpe akopesa yango nkembo. Na ntango wana nde bokomona, koléta, komama, koyoka nsolo mpe koyoka, mpe kozalana elongo. Tokotikáláká koyeba te. . .

Tokokoka kosepela na bomoi ya Mwanje ata moke te. Tokelámá Banje te. Nzambe akelaki Banje. Kasi Akelaki yo ná ngai, mibali mpe basi. Yango nde lolenge oyo tokozwama kati na yango, mpo na libela, na Boyei na Ye oyo epambolami.

67 Sasaipe, bomoni ndenge bazangaki, mpo basumukaki mpe bazangaki nkembo. Nzambe alakisaki bango Likonzi na Móto. Atalisaki bango bilembo mpe bikamwiseli. Abimisaki bango. Amemaki bango kati na komekama, mpo na komeka mpe kolekisa bango na momékano.

68 Sikoyo, bino bozwá komekama mingi te? Bólela-lelaka te na ntina na yango. Bósepelaka nde. Nzambe azali elongo na bino. Azali koluka komeka kondima na bino. Botala Yobo na Kondimana ya Kala, ntango Alobaki: “Bomonaki nde mosali na Ngai Yobo, moto sembo, moto abongi be? Moto moko te azali lokola ye na mabelé.”

69 “Oh,” alobaki, “ya solo, Obatelaka ye: azali na kokoso moko te, azali na mitungisi moko te. Azali na mikumba ya mbongo te, nyonso ezali malamú. Azali na bokono te, na mpasi te. Pesa ngai nzela ya kozwa ye. Nakosala ete átuka Yo, na elongi na Yo.”

70 Alobaki: “Napesi yo ye, kasi komeka kolongola bomoi na ye te.”

71 Oh! Asalaki nyonso, longola bobele kolongola bomoi na ye, kasi akokaki koningisa Yobo te. Yobo ayebaki ete atelemaki ngwi na Liloba. Ya solo. Mpe milimo mabe nyonso ya lifelo bakokaki koningisa ye te, mpo ayebaki ete asilaki kopesa mbeka wana. Azalaki moto sembo. Mpe bafundaki ye, balobaki: “Osali lisumu, Yobo, mpe Nzambe azali kopesa yo etumbu.” Ayebaki ete Nzambe a . . . ete asalaki lisumu liboso na Nzambe te. Ayebaki ete

azalaki moyengebene. Ezali te mpo azalaki moto malamumu, kasi mpo azalaki kondima mbeka ya kotumba na esika na ye.

72 Mpe, na mpokwa oyo, toyebi ete bomoi na ye etalisaki polele ete azalaki moyengebeni. Mpe ntango yo... Ozali koluka te kokota na Nkembo, mpo omekaka kosunga mozalani na yo; ezali malamumu. Ezali te mpo okoti na lingomba; ezali malamumu. Kasi okokende na Nkembo mpo oyambi boyengebene ya Yesu Klisto, ezali eloko oyo yo moko osali te.

73 Sasaipi, wana tokobi kotánga.

Mpo ete biso nsango malamumu eteyamaki... (molongo ya 2)... pelamoko na bango: kasi liloba oyo liteyamaki ejuani na kondima te kati na baoyo bayokaki yango.

Kondima ezalaki te, kati na baoyo bayokaki Liloba.

74 Bókánisa naino, lelo, na mwa lotómo ya komikitisa oyo Nkolo apesi ngai, ba-American milió ntuku minei basengelaki kobikisama, na mpokwa oyo. Boyebi ndenge balobaka? “Ee, ezali télépathie ya makanisi. Atángaka makanisi ya bato. Makambo wana ezalaka te! Ee, azali moto ya lingomba na biso te.” Bomoni? Ezali te... ata soko okokanisi yango na Liloba ndenge nini, mpe otalisi polele ete ezali Liloba na Nzambe, ete ezali elaka ya Nzambe, ata soko science etalisi polele ete Ezali solo, bango bakoki kaka kondima te. Biblia elobi ete bakokaki te.

75 Bokoloba: “Boye, ntina nini koteya Yango?” Nzambe asengeli kozala na motatoli moko, mpo na kokweisa bango, na Mokolo wana. Liloba eteyamaki mpe etalisamaki polele epai na bango, kasi ata bongo, baboyaki yango, na kozanga mayele. Eloko mosusu etikali te, bobele kosambisama. Nzambe akoki te, na bosembo—akoki te, na bosembo, kosambisa ekólo moko, soko epesameli mawa te, liboso ete ésambisama. Azali Nzambe. Akoki kosala yango te.

76 Sikawa, tolobaka nini?

Mpo biso baoyo... tondimaki tosili mpe koingela kati na epemelo, lokola alobaki, Lokola nakataki ndai kati na nkanda na ngai, soko bakoingela na epemelo na ngai: atako misala esilaki kosalema longwa na kozalisama na mokili.

Mpo na esika moko alobi mpo na—na mokolo ya nsambo na ntina oyo ete,...

77 Sikoyo, nalingi kozokisa mitema ya bato te, kotemela losambo na bango. Yango ezali ntina oyo nazali kolanda te. Kuna libanda na bilanga ya mosala, nateyaka kaka malakisi oyo tomeseni na yango, oyo ya mobóko, ya kopalanganisa Nsango-malamumu. Kasi na tabernacle, epai ya bana na ngai awa, Nayokaka ete nazali na makoki ya koteya oyo nakanisaka ete ezali Malakisi mpe Solo. Bomoni? Nakanisi ete ezali malamumu.

⁷⁸ Sikoyo, nazali na baninga balamu nkóto na nkóto, oyo bandimaka Sabata, bato oyo bazali ba-Adventiste du Septième Jour. Banninga na ngai ya motema mpenza, bamosusu kati na bango bazali ba-Adventiste du Septième Jour.

Atako, lingomba monene ya, oyo babengaka, mo—*Mongóngó ya Lisakoli*, batelemelaka ngai makasi mpenza. Balobaki ete nalobaki likambo moko na eteyelo, mpe balobaki: “ngai nazali Nzambe. Mpe ete—mpe ete Pole oyo elandaka ngai ezali Mwanje, mpe ete ngai nazali Nzambe. Ete nayaki na mokili mpo na kosala makambo minene, mpo na kotalisa polele na bato ete nazali Nzambe.” Sasaipi, yango nde likambo oyo *Mongongo ya Lisakoli* elobaki na ntina na ngai, kuna na Californie. Mpe moto nyonso oyo alobaki yango, boyebi, alobaki likambo oyo ezali solo te.

⁷⁹ Kasi likambo ya liboso, nazali kokanisela lingomba ya ba-Adventiste du Septième Jour mabe te, to lingomba mosusu nyonso, oyo endimaka Sabata, kasi ezali bebele mpo na bolamu ya Nsango-malamu. Nsima na mwa minuti, tokolobela ba-Pantecotiste, mpe. Iyo. Solo. Ba-Batiste, tokolobela yango mpo na kotalisa ete Nzambe ayokanaka na ebongiseli ata moko te. Ezali solo. Ayokanaka kaka na moto na moto. Mpe Asalaka ná ebongiseli moko te, Atikálá kosala yango te mpe Akosáláká yango te, kokokana na Liloba na Ye. Kasi Asalaka na moto na moto na bibongiseli nyonso. Iyo, Nzambe asalaka nde na moto na moto.

⁸⁰ Sikoyo bóyoka likambo oyo malamumu mpenza, mpe soko etikali kosalema, na ntango moko boye, motuna yango etikali koyela yo, ekozwa eyano. Sikoyo, tika ete Nkolo ásungá biso.

⁸¹ Sikoyo na bokebi: “Mpamba te. . .” Molongo ya 4.

Mpamba te alobaki na esika moko boye mpo na mokolo na nsambo na ntina oyo, . . .

⁸² Sikawa bótala. Azali koloba na ntina na sabata. Bato boni bayebi ete liloba oyo *s-a-b-a-t-a* na ki-Eb- . . . ezali liloba ya ki-Ebele, oyo elingi koloba “b-o-p-e-m-i”? Bato boni bayebi yango, na Anglais? Ya solo. Liloba oyo *sabata* ezali koyokana ndenge, boye te? Ezali bongo.

⁸³ *Kobulisama* ekoyokana ndenge, boye te? *Kobulisama* ezali liloba ya Greki. *Kobulisama* elingi koloba “kokómisama bulee.” Na ki-Ebele, elingi koloba “kobulisa.” Na Greki, elingi koloba “kosantisa.” Na Anglais, elingi koloba “kopetola.”

⁸⁴ *Sabata* elingi koloba “mokolo ya kopema.” Yango nde oyo sabata ya kala ezalaki, mokolo ya kopema. Ntango bomoni *kopema*, elingi koloba “sabata.” Bótala yango na makomi na bino ya ebandeli, soki esalemi ete bozali na Biblia ya Greki, mpe boluka koyeba soko liloba yango . . . Soko bozali na Biblia ya Scofield, bótanga na nkómá ya pembeni na ntina na “kopema” mpe bokomona soko ekozongisa bino na *sabata* te. *Sabata* elingi koloba “bopemi.” Malamu.

85 Sikawa botala.

Tika ete tozala na kobanga, mpamba te, elaka etikali mpo na biso ya koingela kati na sabata na ye, bopemi, . . .

86 Sikoyo, bato ebele batosaka mikolo, ndakisa batosaka mokolo ya *Mposo* lokola sabata. Bamosusu bakomisi mokolo ya *Lomingo* nzambe ya ekeko, mokolo ya kokumbamela. Na ngolu na Nzambe, mpe na nzela na Liloba na Nzambe, Nzambe ázunga ngai na mpokwa oyo, nakoki kotalisa bino polele ete ngámbo nyonso mibale bazali na libunga. Ná mosambeli ya *Lomingo*, ná motósi ya sabata, bango nyonso mibale bazali mpenza na libunga, kokokana na Liloba. Kútu, nsima na nyonso, na Liloba nde tosendeli komipesa, na oyo ba-Adventiste balobaka te, to na oyo ba-Protestant balobaka te, to na oyo ba-Katoliko balobaka te. Ezali oyo Biblia elobi.

87 Sikoyo, sikoyo bótala malamumu.

Mpamba te alobaki na esika moko boye na mokolo ya nsambo na ntina oyo, . . .

Sikoyo tokotia eloko moko *boye*, mpe tokobenga yango—yango “Bopemi ya Nzambe,” mokolo ya nsambo.

88 Sikoyo bótala malamumu. “Mpe Nzambe. . .” Bóyoka Likomi oyo sasaipi.

. . . Nzambe apemaki mokolo ya nsambo longwa na mosala na ye nyonso.

Nzambe azwaki Sabata, mpe mokolo ya nsambo yango eumelaki mibu nkóto mobimba, elilingi ya Millennium.

Mpamba te alobaki. . . na ntina na mokolo ya nsambo na ntina oyo, Mpe Nzambe apemaki. . . longwa na mosala na ye nyonso.

Likitana bomei: “Misala na Ye nyonso.” Apemaki na mokolo ya nsambo. Wana nde Nzambe.

Mpe na esika oyo (na nse ya mobeko), Soko bakoingela kati na epemelo na ngai.

89 Nzambe apemaki, na nzoto, mpo Autaki kosala Likolo mpe mabelé na mikolo motoba, mpe na mokolo ya nsambo Apemaki na misala na Ye nyonso. Apemaki mibu nkóto moko. Mpamba te Biblia elobi, ete: “Mokolo moko na mokili ezali mibu nkóto na Likoló; mibu nkoto na Likoló, ezali mokolo moko na mokili.” Bato boni bayebi ete Makomi elobi yango na Petelo ya Mibale? Malamumu. “Nzambe apemaki na mokolo ya nsambo. Mpe Alobaki na ntina na yango na esika moko boye.”

90 Sikawa bóyoka na bokebi.

Mpamba te alobaki na esika moko boye mpo na mokolo ya nsambo na ntina oyo, Mpe Nzambe apemaki. . . na misala na ye nyonso.

Mpe na esika oyo lisusu, (mobeko), Soko bakoingela kati na epemelo na ngai.

Apesaki Bayuda, ntango bautaki na mboka ya elaka, to, na Ezipito, kokende na mboka ya elaka, sabata ya mokolo ya nsambo.

91 Sikawa bóyoka.

Na bomonaká bongo ete etikali ete bamosusu basengeli koiingela, mpe na baoyo yango eteyamaki liboso. . .

Bopemi! Nzambe apesaki bango mobeko, mpe sabata ezalaki mobeko ya minei.

. . . baingelaki te mpo na kozanga kondima: . . .

92 Sikoyo bótala. Azali kolobela mobeko, ndenge baktaki, bazalaki na kondima te. Bazalaki kotosa yango te. Bazalaki kotosa sabata na ekaniseli, ete bazalaki kokende na mboka ya sabata, mpo na kopema libela na ba-mpasi na bango nyonso mpe mitungisi na bango nyonso, bakapíta ya misala balingaki lisusu kozala te, ná babutú ezánga bopemi. Bazalaki kokende na mboka ya elaka ya bopemi. Ezalaki kotanga na miliki mpe mafuta ya nzói. Ekata ya mbuma ya miwiti ezalaki minene mingi na lolenge ete mibali mibale bamemaki moko na yango na mapeka na bango. Oh, ezalaki mpenza mboka ya bopemi oyo epambolami! Kasi bazwaki yango te ntango bakómaki kuna, mpo na kozanga kondima na bango. Bakendekaki mopanzi na nzela, ezalaki kaka kilometre ntuku motoba na mitano banda na esika oyo balongwaki na Ezipito, kino na mboka ya elaká. Mpe ezwaki bango mibu ntuku minei mpo na kokóma kuna, mpo na kozanga kondima na bango. Nzambe apesaki bango mosakoli na bango, apesaki ye elemba na Ye, apesi ye Likonzi na Móto, atalisaki bilembo mpe bikamwiseli, mpe ateyaki bango Nsango-malamu. Mpe babimaki, balandaki mbisi ná mápa, mpe bakweaki kati na lisobe. “Mpe bibembe na bango epolaki na lisobe.”

93 Yesu, na liziba, Alobaki.

Balobaki: “Batata na biso baliaki mána na lisobe, mibu ntuku minei.”

94 Alobaki: “NAZALI Lipa ya Bomoi oyo euti na Nzambe longwa na Likolo. NAZALI Lipa ya Bomoi. Mose apesaki bino Lipa yango te. Tata na Ngai nde apesaka Lipa yango. Mpe NAZALI Lipa oyo euti na Nzambe, longwa na Likolo. Soko moto alei Yango, akokufa te.” Yango nde bokeseni.

95 Sikawa bótala. Balobaki ete Ye. . . “Bamelaki mai oyo ebimaki na Libanga oyo ezalaki na lisobe, na ntáká ya mibu *mingi* mpenza.”

96 Alobaki: “NAZALI Libanga yango.” Nkombo na Ye ya Bule épambolama! “NAZALI Libanga yango.”

Ndenge nini Akokaki kozala Libanga yango? Libanga yango ezalaki Libanga ya molimo. Ezalaki kolanda bana ya Yisraele. Mpe Mose azalaki na Lingenda na loboko na ye, ezalaki lingenda ya kosambisa ya Nzambe. Mpe Nzambe ayebisaki ye ete ábeta Libanga yango, mpe abetaki Libanga yango. Mpe ntango asalaki bongo, mai ebimaki na Libanga. Mpe Klisto azalaki Libanga yango, mpe etumbu ya Nzambe mpo na kosambisa lisumu ebetaki Ye. “Nzambe atiaki likolo na Ye masumu ya nko ya biso nyonso,” mpe lisumu ya nko yango epasolaki motema na Ye. Mpe longwa na motema na Ye Molimo Mosantu esopanaki, lokola bitima ya mai, ekendeki epai ya bato oyo bazali kobeba mpe kokufa.

“NAZALI Libanga oyo ezalaki na lisobe.”

“Na bongo,” alobaki: “Olingi koloba . . .”

⁹⁷ Alobaki: “Mose, moto oyo ayebisaki bino yango, azalaki na mposa makasi ya komona mokolo na Ngai. Mpe amonaki yango bobele ndambo.”

⁹⁸ Alobaki: “Sikoyo, Olingi koyebisa biso ete Ozali monene koleka Mose? Ete Omonaki Mose? Mpe Mose asilaki kokufa mibu nkama mwambe.” Balobaki: “Sikawa toyebi ete Ozali na molimo mabe,” na elobeli mosusu, libóma. “Toyebi ete Ozali libóma.”

⁹⁹ Alobaki: “Liboso ete Abraham ázala, NGAI NAZALI. Nazalaki YA MONENE OYO NAZALI oyo azalaki kati Na nzete ya kopela móto. Nazali Móto wana oyo ezalaki kati na nzete ya kopela na móto. Nazali Mwanje oyo azalaki kokende liboso na bango.” Mpe Alobaki: “Nauti na Nzambe, mpe Nazali kozonga na Nzambe.” Mpe Ye autaki na Nzambe, akómaki nzoto mpe afandaki elongo na biso; azongaki na Likonzi na Móto yango moko.

Mpe tala Ye oyo, na mpokwa oyo, nsima na mibu nkóto mibale, “ndenge moko lobi, lelo, mpe libela,” kosaláká likambo yango moko, kokambáká bapambolami bana na Ye.

¹⁰⁰ Mpe mingi bazali kokota . . . mpo na kozanga kondima. Sikoyo, alobaki: “Akataki mokolo moko,” mokolo moko oyo Nzambe asilisaki mosala na Ye. Na nsima: “Akataki ‘mokolo mosusu’, na ntina na yango, ete soki bakoyoka, soko bakoya, baoyo batosaka basabata, baoyo batalelaka basánza ya sika mpe bongo na bongo.” Nde esika wana bandeko ba-Adventiste balukaka kozongisa bino.

¹⁰¹ Sikoyo tókoba kotánga. Bótala.

Na yango, komona . . . ete bamosusu basengeli koingela kuna na kati, mpe bango epai na banani eteyamaki liboso bakotaki te mpo na kozanga kondima.

¹⁰² Sasaipi, molongo ya 7. Oh, la la! Nalobaka ete Makomi epemelami malamumu be na lolenge ya matematiki. Nalobaka ete

Makomi epemelami, na ndenge nyonso. Matematiki ya Biblia ebongi be.

¹⁰³ Bomonaki ete Etats-Unis oyo ezali motango zomi na misato na makambo nyonso yango esalaka? Boyebi ete ebandaki na ba-colonie zomi na misato? Boyebi ete, na ebandeli, bendele ezalaki na minzóto zomi na misato? Boyebi ete nyonso oyo Etats-Unis esalaka ezalaka na motango zomi na misato? Boyebaki ete na Biblia, emonani na Emoniseli 13? Ezali mpenza bongo. Nyama moke, mwana mpate oyo emataki uta na mai, eutaki na libondo mpe na ebele ya bato te, . . . eutaki na mai te, kasi eutaki na mabelé, epai moto azali te. Ezalaki na mwa maséké mibale: ba-nguya ya letá mpe ya eklézia. Mpe azalaki mwana-mpate: bonsomi ya kosambela. Mpe nsima na mwa ntango, basanganaki mpe alobaki lokola dalagona, mpe asalelaki nguya nyonso oyo Roma ezalaki na yango liboso na ye. Yango nde ezoya na ekólo na biso. Bókoma yango. Bótala malamú ndenge Lisanga ya Mangomba ná Katoliko kosangana elongo, mpe bótala likambo oyo kosalema.

¹⁰⁴ Bato oyo bazali kolanda Likonzi na Móto bakoleka na ntango moko ya mpasi, kasi na ntango yango, bakosila kobelema mpo na konétolama, ya solo, bakobelema mpo na kokende. “Mpo Mwana-mpate alongi bango,” elobi Biblia, “ná baoyo bazalaki kolanda Ye, mpamba te babengamaki baponami mpe basémbwi, Baponami ya Nzambe.” Nalingi kokoba na lisakoli wana te sasaipi, mpo tókoka kokoba na oyo.

¹⁰⁵ Bóyoka na bokebi, mokapo ya 7, mo. . . nalingaki koloba mokapo ya 4, molongo ya 7. Nsambo ezali motango ya bosukisi. Misato ezali motángo ya Bomoi. Nsambo ezali motango ya bosúkisi, mpe yango nde epesi sabata na mobimba.

“Mpe lisusu,” bomikanisela, alobaki, “Nzambe,” na ntina na yango. Na nsima alobelaki “mobeko,” na ntina na yango. Na bongo, lisusu, “Abongisaki mokolo moko,” mokolo ya misato, mbala ya misato.

Lisusu, ye abongisaki mokolo moko, mokolo moko boye, elobami kati na Dawidi, Lelo oyo, nsima na ntango molai mingi; . . . Lelo oyo, nsima ya ntango molai mingi; ndenge elobami, Lelo oyo soko bokoyoka mongongo na ye, bóyeisa motema na bino makasi te. (Bótala malamú.)

. . . soko Yesu ápesaka bango (sabata) bopemi, . . . akokaki te nsima na yango kosolola na ntina ya mokolo mosusu.

Bantango ya mosala ebongwanaka elongo na Yesu Klisto: longwa na mobeko kino na ngolu, longwa na misala kino na ngolu, longwa na eloko moko oyo yo osalaka kino eloko moko oyo Nzambe asila kosala, na mabongi na yo moko to na mabongi na Ye. Ebongwanaka.

106 Ntango Mose abimaki na lisobe, ná mobeko, alobaki: “Okosala ekobo te. Okoyiba te. Okoboma te. Tosa mokolo ya sabata bulee.” Ntango Yesu abimaki na lisobe. . . Ntango Mose ayaki, zabolo amekaki ye. Kaka ntango zabolo amekaki ye, akweyaki na yango. Mose azalaki na bolembu moko. Bato boni bayebi oyo yango ezalaki? Nkanda. Kaka ntango amonaki bango kokumbamela mwana-ngombe ya wolo, abwakaki mibeko na nse mpe abukaki yango, kotalisa yo ete bonganganzambe ekobukana. Mpe Nzambe apesaki ye yango lisusu.

107 Kasi ntango Yesu abimaki na lisobe, nsima na kokila bilei mikolo ntuku minei, Akómaki na nzala, bolembu bobele moko oyo Azalaki na yango. Mpe zabolo ayaki epai na Ye mpe alobaki: “Soki Ozali Mwana na Nzambe, bongola mabanga oyo ekóma mapa. Sala ekamwiseli moko awa. Tika námona Yo kosala yango, bongo ná kondima Yo.”

108 Yesu alobaki: “Ekomami: ‘Moto akobika bobele na lipa te, kasi na Maloba nyonso oyo ebimaka na monoko ya Nzambe.’” Ayebaki ete akutanaki na Mose te, kuna, mpamba te Ye akendeke na Liloba.

109 Amemaki Ye na nsóngé ya tempelo, alobaki: “Soko Ozali Mwana na Nzambe, Mibwaka na nsé.” Mpe *apokolaki sukali*, azongelaki te, kasi apokolaki sukali Likomi yango. Alobaki: “Ekomami ete: ‘Akopesa mitindo na Banje, na ntina yango, mpo lokolo na Yo étuta libanga ata moke te. Akomema Yo likolo.’”

110 Mpe Yesu akendeke mbala moko na Liloba, mpe apamelaki ye.

111 Amemaki Ye likolo na ngomba mpe alakisaki Ye Etats-Unis, Allemagne ná Suisse, mpe bikólo nyonso ya mokili, oyo elingaki koya, alobaki: “Nyonso ezali ya ngai. Nasalaka na yango ndenge nalingi.” Kokamwa te ndenge tozalaka na bitumba mpe bampasi. Alobaki: “Nasalaka na yango. . .” Kokamwa te ndenge balataka. . . ndenge bazali nsomi na yango, na mobeko. Nyonso ekonzami na zabolo. Yango nde Biblia elobi. Satana alobaki: “Ezali ya ngai. Nasalaka na yango ndenge nalingi.” Alobaki: “Soki Okumbameli ngai, nakokómisa Yo mokonzi lokola ngai.”

112 Yesu alobaki: “Ekomami: ‘Okokumbamela bobele Nkolo Nzambe na yo, okosalela bobele Ye.’ Nsima na Ngai, Satana.”

Mpo na nini? Yesu ayebaki ete Akosangola yango na Millennium monene oyo, ntango Bokonzi na Ye ekoya. “Mokano na yo ésalema na mokili, ndenge esalemaka na Likolo.” Bilamba ya mikuse ekolatama lisusu te. Masanga ekomelama lisusu te. Bilulela ekozala lisusu te. Ekobo ekozala lisusu te. Kufa ekozala lisusu te. Mawa makozala lisusu te. Asangoli bikólo nyonso. Ezali ya Ye. Ya solo. Ezali ya Ye, mpe Akosangola yango. Kasi Satana azali na yango mpo na mwa ntango, elingi koloba lelo, ntango tozali kobika.

113 “Kasi Akataki mokolo moko, Alobaki: ‘Lelo, nsima na ntango nyonso oyo.’ Mpe Alobaki: ‘Bóyeisa mitema na bino makasi te.’”

Mpo soko Yesu akokaki kopesa bango bopemi, . . . mbe akokaki lisusu te nsima na yango kosolola mpo na mokolo mosusu.

114 Ndeko na ngai Adventiste, tala Yango. Paulo nde alobaki, awa. Mpe Paulo alobaki, na Bagalatia 1:8, soko bozali kokoma Makomi yango, Bagalatia 1:8, “Soko Mwanje ya Likoló ayei koteya nsango-malamu mosusu libanda na Oyo ngai nateyi, álakelama mabe.” Paulo alobaki: “Soko Yesu alingaki kopesa bango mokolo ya Bopemi . . .”

115 Botala, ntango Autaki na ngomba. Akitaki nde. Autaki kolonga zabolo. Asilaki kopakolama, kobelema mpo na mosala na Ye. Alobaki: “Boyokaki bango koloba, bato ya ntango ya kala, ete: ‘Okoboma te,’ kasi Ngai nalobi na bino ete moto oyo asilikeli ndeko na ye, kozanga ntina, asili koboma. Boyokaki bango koloba, bato ya ntango ya kala,” lelo oyo, batósi ya sabata. “Boyokaki bango koloba, kala, na ntango eleká, na nsé ya mobeko, ete: ‘Okosala ekobo te.’” Moto asengelaki kosala mpenza likambo yango, mpo ákweisama. “Kasi Ngai nalobi na bino ete moto nyonso oyo akotala mwasi mpo na kolula ye asílí kosala na ye ekobo na motema na ye.” Ekese! Eleki mpenza pembeni na mobeko oyo ya minei. Kasi Ye apesaki bango Bopemi?

116 Tótala ndenge alobaki. “Dawidi alobaki: ‘Nsima na ntango molai, Bopemi be elingaki koya.’” Nzambe apemaki na misala na Ye, mokolo ya nsambo. Nzambe apambolaki mokolo ya sabata, mpe apesaki yango epai na Bayuda kati na lisobe, na ntina oyo. Bakotaki . . . mpo na kozanga kondima, mpo Liloba esanganaki na kondima te. “Mpe lisusu, Akataki mokolo moko, Alobaki kati na Dawidi ete: ‘Nsima na ntango molai boye.’”

Mibu nkama na nkama nsima na Dawidi kokufa, Mwana na Dawidi alingaki kotelema, elingi koloba Yesu, “Mpe soko bakoyoka Mongongo na Ngai, koyeisa motema na yo makasi te.” Nzambe alobaka na motema.

117 Sikawa bótala, mpo na molongo ya 9 sikoyo, mpo na bino baoyo bozali kotánga. “Yesu alingaki kopesa bango bopemi,” molongo ya 8, “Alingaki . . . kolobela mokolo mosusu.”

118 Soki sabata esengelaki kozala, soki tosengelaki kotosa mokolo ya Lomongo, na bongo Alingaki kolobela yango. Soki Álobaka: “Sikawa sabata ezali lisusu te, bótosa lisusu mokolo ya nsambo te, oyo Nalingi ete bótosa ezali nde mokolo ya Lomongo,” Alingaki koloba yango. Paulo alobaki ete Asalaki yango. Alingaki koloba: “Bino nyonso bósambela mokolo ya Lomongo. Yango nde ekozala bopemi.” Ee, soki Álingaka ete bátosa sabata, Alingaki koloba: “Bókoba kotosa mokolo ya

nsambo. Kasi sikawa Nalingi ete bótosa mokolo ya Lomingo, mokolo ya mwambe.” Te. Alobaki yango te.

119 Alobaki: “Soki Yesu álingaka kopesa bango mokolo moko, Alingaki kolobela yango te?”

120 Sikoyo molongo ya 9. Bómilengela.

Na yango etikali na bopemi moko mpo na bato ya Nzambe, botosi-sabata moko mpo na bato ya Nzambe.

Mpo ete ye oyo asili koingela na bopemi na ye (oyo ya Klisto), asili mpe kotika misala na ye moko, ndenge Nzambe apemaki na oyo ya ye, na sabata.

121 Bomoni yango? Sikawa tózwa mwa Makomi mpo na kotalisa yango. Malamu. Ntango Nzambe asalaki mokili na mikolo motoba, Apemaki na mokolo ya nsambo, mpe Asalaki lisusu te. Nkombo na Nkolo épambolama. Ye atongáki mokili, atiaki bikelamo kati na yango, mpe akendeki kopema; mpe azóngá lisusu te, mpo na kotonga mokili mosusu. Asilisaki mosala, mpe akendeki kopema. Sikawa, na... Bongo, nsima na mibu nkóto wana, lisumu ekotaki; bongo Klisto atalisamaki, Mwana-mpate atalisamaki. Sikawa, yango epesamaki na Bayuda lokola etaliseli ya Bopemi ya mokolo ya nsambo.

Sikawa, abongisaki mokolo mosusu, alobi kati na Dawidi, . . . nsima ya ntango molai mingi, ete ezali na bopemi, mosusu ekoya.

122 Sikawa Bopemi yango ezali nini? Bofungola elongo na ngai na Matai, mokapo ya 11, mpe eteni ya nsuka ya mokapo ya 11 ya Santu Matai. Ezali ntango Yesu asilisaki liteya na Ye likolo ya ngomba, mpe bokomona oyo Alobaki.

123 Alobaki: “Ye oyo akotala mwasi, mpe aluli ye, asili kosala na ye ekobo na motema na ye. Ye oyo akosilikela ndeko na ye, kozanga ntina, asili koboma ndeko yango.” Makambo nyonso oyo, kasi Asimbaki mobeko ya minei wana te, sabata yango.

124 Sikawa Azali kosukisa. Mpe Sabata ezali Elaka monene ya Nzambe. Ezali Bopemi. Sikawa, sikawa botala malamumu awa, ntango Asilisaki kolobela mapamboli. Awa Alobi, na molongo ya 27 ya mokapo ya 11 ya Santu Matai. Kuna, na mokapo ya 5, Azalaki kolakisa mapamboli.

Biloko nyonso esili kopesama na loboko na ngai, epai na ngai longwa na Tata: mpe moto moko te ayebi mwana, bobele Tata; . . .

Bomoni, bokoki koyeba moko te kozanga koyeba mosusu, mpo Azalaki Tata oyo amonisami kati na nzoto.

. . . ndenge moko mpe moto moko te ayebi Tata, bobele Mwana, . . .

125 Ezali komonana lokola ete bato bakokaki komona Yango mpe kozanga kobeta ntembe. Solo mpenza. Nzambe Azali bato

misato te. Soki Azali Banzambe misato, boye tozali bapagano. Nani kati na bango azali Nzambe? Bango nyonso misato bazali Nzambe moko, ezali misala misato ya Nzambe yango moko. Azalaki Tata, na lolenge ya Molimo Mosanto, kati na Likonzi na Móto wana, kati na lisobe. Azalaki Mwana, ntango Asalelaki mosala ya Bomwana. “Nsima na ntango moke, mokili ekomona ngai lisusu te; nakokende. Nakoya lisusu mpe nakozala elongo na bino, ata kati na bino, kino na nsuka ya mokili.” Bomoni? Azali Botata, Bomwana, mpe Molimo Mosanto, mpe lokola. Nyonso wana ezali Nzambe yango moko na misala misato: Botata, Bomwana, Molimo Mosantu. Ata mbala moko te. . .

Yoane ya Liboso 5:7 elobi: “Misato bazali kopesa litatoli na Likolo: Tata, Mwana, Molimo Mosanto. Bango misato bazali Moko.”

¹²⁶ Tomás alobaki na Ye: “Nkolo, lakisa biso Tata.” Ekokoka na ye.

¹²⁷ Alobaki: “Nazali na bino ntango molai boye, mpe boyebi Ngai te?” Alobaki: “Ntango omoni Ngai, omoni Tata. Mpe mpo na nini olobi: ‘Lakisa biso Tata?’”

¹²⁸ Sikawa, ba-Unitaire bazwaki yango, etonga ya ba-Unitaire, balukaka kokómisa Tata, Mwana, mpe Molimo Mosanto, mosala kaka moko mpe esika kaka moko, lokola mosapi na yo, moko. Ezali libunga. Nzambe akokaki te. . . Yesu akokaki kozala tata na Ye Moko te. Soki Azalaki bongo, boye Azalaki. . . Ee, ndenge nini Akokaki kozala tata na Ye Moko?

¹²⁹ Mpe soki Nzambe azali moto, oyo akabwani na Molimo Mosanto, Azalaki na batata mibale. Mpamba te Biblia elobi ete: “Molimo Mosanto azipaki Maria mpe azwaki zemi.” Mpe Biblia elobi, na Matai 1:18, ete “oyo ezali kati na ye euti na Molimo Mosanto.” Na bongo, nani nde tata na Ye, Molimo Mosantu to Nzambe? Bango mibale, Molimo yango moko, to Abotamaki kati na makango na nzela ya milimo mibale.

Ezali eyambweli ya Katoliko, mpe ezali malakisi ya Biblia ata moke te. Martin Luther akobaki na yango, ná Bokatoliko ebele mosusu oyo ezali kati na lingomba ya Luther. Wesley akobaki na yango na nsima. Mpe ezali bobele kokoba, kasi ezali libunga. Ezali Solo te. Etikálá kozala te, etikálá kozala Malakisi ya Biblia te. Etikálá kozala mobeko kati na Biblia te, kolakisa ba-Nzambe misato.

Nzambe azali moko. Yesu alobaki: “Bóyoka, O Yisraele, Nazali Nkolo Nzambe na yo, Nzambe moko,” ba-Nzambe misato te.

¹³⁰ Na Afrika, babatisaka mbala moko mpo na Tata, mbala moko mpo na Mwana, mpe mbala moko mpo na Molimo Mosanto. Mpe mwa Moyuda wana ayei, alobi: “Nani kati na bango azali Nzambe na bino? Nani azali Tata, Mwana, to Molimo

Mosantu?” Bango nyonso misato bazali Moko. Biblia elobi ete bazali Moko.

¹³¹ Yesu azalaki ndako oyo Nzambe azalaki kofanda kati na yango. Biblia elobi ete—ete, Timoté ya Liboso 3:16: “Na *ntembe* te,” (ezali, “kobendana maloba”) “libombami ya bonzambe ezali monene. Mpamba te Nzambe amonisamaki kati na nzoto, amonanaki na Banje, ayambamaki na...ateyamaki, andimamaki, mpe ayambamaki na Nkembo.” Nzambe nde. Biblia elobi: “Nkombo na Ye ekozala *Emanuele*, oyo na elimboli elingi koloba: ‘Nzambe elongo na biso.’” Biblia elobá ete: “Yesu, litondi mobimba ya Bonzambe kati na nzoto efandaki kati na Ye.”

¹³² Ndenge tolobaki yango na mpokwa mosusu: Nzambe, na ebandeli, azalaki Molimo. Mpe longwa na Nzambe, Logos ebimaki, to theophanie, oyo ezalaki na lolenge ya moto, abengamaki Mwana na Nzambe, na elilingi. Ayaki na mokili, na nzoto ya mosuni, liboso kutu Aya kati na Yesu Klisto. Sikawa, mela naino oyo wana, ndeko. Nakotalisa bino yango polele.

¹³³ Ntango—ntango Mose amonaki Ye. Alobaki: “Lakisa ngai lolenge na Yo, Nkolo.” Mpe Nzambe abombaki ye kati na libanga. Mpe ntango Alekaki wana, alobaki: “Ezalaki mokongo ya moto.” Yango ezalaki Theophanie wana. Ezali mpenza bongu.

Na nsima, Theophanie yango esengelaki kokóma mosuni. Moto mosusu te, kasi bobele Moto yango moko nde asengelaki kokóma mosuni, mpo na kolongola esweli ya kufa.

Lokola nzói, ntango eswaka, etikaka esweli na yango. Mpe atikálá kotika yango te... Akokaki kotia tonga na mosuni ya moto mpo ezali lisumu. Kasi, ndeko, ntango aswaki mosuni oyo ya Emanuele, abungisaki esweli na ye. Iyo, misie. Akoki kosala makelele kasi azali lisusu na esweli te.

¹³⁴ Kokamwa te, Paulo, ntango balingaki kokata ye motó, alobaki: “E kufa, wapi esweli na yo? Okoki kosala makelele mpe konguluma na ndenge nyonso olingi. Nkunda, wapi elonga na yo? Kasi matondi na Nzambe, oyo apesi biso elonga na nzela na Yesu Klisto.” Yango mpenza.

Esengelaki na Nzambe Ye moko mpo na kosala yango. Ayaki mpe Amonisamaki kati na mosuni. Azongaki kati na Molimo.

¹³⁵ Okoloba: “Ndeko Branham, otikálá koyebisa biso te, ntango nini Nzambe akómaki mosuni liboso ete Áya kati na Klisto.”

Ntango Abraham afandaki na nsé ya hema na ye, mokolo moko, Banje mibale ná Nzambe bayaki, na makolo kino epai azalaki, na nzoto ya moto, Bazalaki na putulú na bilamba na Bango mpe bazalaki ya kolemba, mpe bafandaki. Mpe Abraham akendeke kozwa mwana-ngombe epai ya mama-ngombe moko, mpe abomaki yango. Mpe alambaki mipanzi ya mwana-mpate. Akendeke kozwa...atindaki Sara ázwa ndambo ya fufu ya

masango, áyungula yango, mpe ásala mwa ba-gató. Mpe azwaki mateka ya ngombe, mpe azwaki manteka ya miliki. Mpe ayaki na yango wana mpe akitisaki yango, mpe Nzambe aliaki yango.

136 Aleluya! Nde ntina: “Kondima na ngai etaleli Yo, Yo Mwana-mpate ya Kalvari.”

137 Bokanisi ete ezali likambo monene mpo na Nzambe? Nzambe, Oyo asalaki potáse, calcium, mpe biloko nyonso na mokili, Akitaki mpo na kotala Abraham. Alobaki: “Okanisi ete nakobombela yo yango, komona ete ozali mosangoli ya mokili?” Amen. “Nakobombela yo yango te.” Nzambe azali mpenza na . . .

138 Tosalémá na biloko zomi na motoba. Azwaki bobele mwa potasi, ná mwa calcium, mwa petrole, lumiere cosmik, “Fiu!” “Kota kuna, Gabriel,” nzoto!

139 “Fiu!” “Kota na oyo wana, Absinthe.” Akotaki na kati na yango.

Banje mibale, uta na Likoló!

140 Nzambe asembolaki loboko mpe azwaki ndambo na yango, “Fiu,” akotaki na kati, Ye moko. Akitaki awa, mpe azalaki na nzala. Epambolami . . . Bolobi nini mpo na yango, bandeko ba-Adventiste oyo balingaka kolia mosuni te? Tokolobela yango, nsima na mwa ntango. Nzambe na Nguya nyonso, Jehovah, bótala soko Nkombo yango moko elimbolami ndenge moko te na nzete ya kopela na móto! Aleluya!

Mpe ntango Azalaki na mokili, Alobaki: “Liboso ete Abraham ázala, NGAI NAZALI, bobele Ye moko wana na nzete ya kopela móto.” Ezali solo, Elohim, bótala soko ezali yango moko te. Ye nde Azalaki na nzete ya kopela móto.

141 Azalaki Oyo awa, liboso na Abraham, na nzoto ya mosuni, nde aliaki mosuni ya mwana-ngombe, mpe amelaki miliki ya ngombe, mpe aliaki mateka likolo na gató. Nkombo ya Bulee ya Nzambe épambolama! Akitaki kuna mpe Alobaki: “Nakotika te . . .”

Mpe Apesaki mokongo na Ye. Alobaki: “Abraham, Nakoya kotala yo, mpe okobota mwana yango. Okómi na mibu mokama sikawa, mpe Sara akómi na mibu ntuku libwa.” Mpe Sara, na kati ya hema, asalaki: “Ha!” asekaki. Alobaki: “Eloko nini esekisi Sara?” Nsima na Ye; hema katikati na bango.

142 Abraham alobaki: “Sara, oseki?”

143 “Te, naseki ata moke te.”

144 Alobaki: “Iyo, oseki.” Oyo wana ezali telepathie ya ndenge nini? Ezali botángi-makanisi ya ndenge nini?

Azali kosala ndenge moko lelo. Azali Jehovah-jireh, Jehovah-rapha, ndenge moko lobi, lelo mpe libela. Akweaka te.

145 Bótala Ye. Ye wana. Ayaki wana mpe Asololaki na Abraham; mpe Alimwaki, na miso na ye. Mpe mpaka monene Abraham

alobaki ete “asololaki miso na miso ná Nzambe, Elohim,” Nzambe yango moko. Bososoli yango? Bato misato te, ndeko. Misala misato ya Moto yango moko!

¹⁴⁶ Na ebandeli ezalaki ndenge moko, Azalaki Molimo monene wana, Liziba epai wapi bosolo nyonso, bolingo nyonso, kimia nyonso. Nyonso oyo ezalaki peto ezalaki kati na Liziba yango. Ebandaki kosala nzoto moko, theophanie, lolenge ya nzoto oyo tokozala na yango. Nzoto ya nkembo te, kasi nzoto lokola oyo ya banje; ezali na lolenge ya nzoto, lolenge.

¹⁴⁷ Mbala nyonso namonaka nzete, nakanisaka: “Nzete yango ezali elili. Oyo ya solosolo ezali na esika moko boye.” Nzete yango esalemá na eloko moko boye. Mayele moko nde esalaki yango. Mabelé oyo etalisaka bobele oyo ya Likoló. Biblia elobi bongo. Mpe soko nzete moko ezali awa, oyo esengeli kokufa, mosusu ezali na Nkembo, oyo ekokufa te.

¹⁴⁸ Soko namoni moto, soko namoni bilenge babalani mibale, mobali ná mwasi na ye, bazali kotambola na balabala, bango mibale balingami, etalisaka nini? Nkombo na Nkolo épambolama! Mosusu ezali na Likoló, oyo ekokufáká te. “Soko hema oyo ya mokili ebebi, tozali na mosusu oyo ezali kozela,” theophanie.

¹⁴⁹ Na bongo bososoli bosato bosantu: Molimo monene, oyo efandi kati na Mwana, Yesu; Yesu afandi kati na Lingomba. “Na mokolo wana, bokoyeba ete Ngai nazali kati na Tata, Tata kati na Ngai, mpe Ngai kati na bino.” [Maloba mazangi na eteni oyo ya bande—Mok.] Nyonso oyo Nzambe azalaki, Asopaki yango kati na Yesu; nyonso oyo Yesu azalaki, Asopaki yango kati na Lingomba. Yango mpenza. “Ngai kati na Tata, Tata kati na Ngai; Ngai kati na bino, mpe bino kati na Ngai.” Wana nde—Wana nde Nzoto yango.

¹⁵⁰ Yango nde likambo ná lingomba. Balakísá bango mwa malakisi moko boye, ezangá ntina, ya mibange bamama ya kala moko boye, bayenga-yengaka mpe basalaka moziki ya komela súpu mpe ya kobeta masano ya kalati. Kokamwa te ndenge tokoti kati na mobulu oyo tozali na yango. Tozali na ntina te ya manáka ya bana ná ya mwa baféti ya komela súpu. Oyo tozali na yango bosenga ezali nde Nsango-malamu ya makasi, mpe mibali ya kondima oyo babimisaka mopanga, mpe babetaka mondenge. Oyo tozali na yango bosenga lelo, ezali te theologie moko boye to makanisi moko boye, esalemi na lisanga ya bato moko boye. Tozali na bosenga ya Nsango-malamu oyo ezali koteyama kati na Pole, Nguya mpe kotalisama ya Molimo Mosanto.

¹⁵¹ Bótala awa sikawa.

Ndenge alobaki, *ye* abongisaki *mokolo* mosusu, *alobi kati na Dawidi*, . . .

. . . *soko Yesu ápesaka bango bopemi*, . . . *alingaki te*. . . *kolobela na ntina na mokolo mosusu*.

Kasi etikali. . . na bopemi mpo na bato na Nzambe.

Mpo ete ye oyo asili koingela na bopemi na ye, . . . asili kopema na misala na ye moko, ndenge Nzambe apemaki na oyo ya ye.

152 Sikawa, tokotánga wapi? Na Matai, mokapo ya ntuku mibale na- . . . Mokapo ya 11, molongo ya 27.

Makambo nyonso oyo Tata apesi na ngai, mapesameli ngai na Tata na ngai, kútu: mpe moto ayebi Mwana te, bobele Tata; (Malamu.) mpe moto ayebi Tata te, bobele Mwana, mpe ye oyo Mwana akolinga komonisa ye.

153 Bomoni, ezali te boni oyekoli, boni e—episkopo alingi ete yo óyeba. Ezali nde boni Nzambe alingi yo óyeba. Soki omoni Emoniseli oyo te, kotuna episkopo te. Tuna nde Nzambe. Kotuna mobateli na yo te. Tuna nde Nzambe. “Mwana nde amonisaka Ye,” Ye, likitana bomei.

154 Bóyoka. Likambo oyo ekopesa bino mpasi. Mobeko yango oyo. Paulo alobaki: “Soko Ábongisaka mokolo mosusu, Alingaki kolobela yango.” Kasi tala oyo Alobaki.

Boya epai na ngai, bino nyonso oyo bozali kolemba na mosala mpe kokumba bojito mpe nakopesa bino sabata, bopemi.

Bokamata ekanganeli na ngai likolo na bino, mpe boyekola na ngai; jambi nazali na bopolo mpe na motema mosokemi: mpe bokozwa sabata na elimo na bino.

Mpo ete ekanganeli na ngai ezali pete, mpe mikumba na ngai ezali na bojito te.

155 Bótala oyo Paulo alobaki.

. . . soki Yesu ápesaka bango bopemi, . . . alingaki kolobela mokolo mosusu.

Kasi ye abongisaki. . . mokolo, alobaki kati na Dawidi, . . . nsima na ntango molai boye; . . . ntango boyoyoka mongongo na ye, bóyeisa motema na bino makasi te.

“Mpe etikali. . .” Sikoyo bóyoka, molongo ya 9.

Na bongo bopemi moko etikali, sabata, mpo na bato na Nzambe.

Mpo ete ye, mobali to mwasi, oyo asili koingela na bopemi na ye. . .

“Boya epai na Ngai, bino nyonso oyo bolembi mpe bozali na mikumba, Nakopesa bino kopema.”

. . . asili kopema longwa na ya ye. . . misala, ndenge Nzambe apemaki na oyo ya Ye.

156 Okoki kozala na mibu ntuku mibale. Okoki kozala na mibu ntuku misato. Okoki kozala na mibu ntuku mitano. Kasi na monuti oyo oyoki Mongóngó na Nzambe kobeta na motema mwa yo, koyeisa yango makasi te. Bongo ingela. . . “Ye oyo akoyoka Maloba na Ngai, mpe akondimela Ye oyo atindi Ngai, azali na Bomoi ya libela, Bomoi ya Seko, mpe akokweisama te kasi asili kolongwa na kufa mpe koingela na Bomoi.”

157 “Tala, Ndeko Branham, likambo nini esalemaka?” Ozwi Molimo Mosantu. Klisto akoti kati na yo. Boye te?

158 Bofungola elongo na ngai na Yisaya, mokapo ya 28, mpe tótánga. Yisaya, mokapo ya 28, tómona ndenge mosakoli alobaki na ntina na yango. Matai. . . 28, kobanda na molongo ya 8. Oyo nde likambo ya mpasi na ntango ya nsuka. Tosengeli kosukisa na miniti moko.

Mpamba te mésa nyonso ekotonda, etondi na kosanza mpe. . . esika ya peto ezali te.

159 Nátelema naino miniti moko. Ndenge Ernie alobaki mokolo wana na mpokwa, azalaki kosolola na moto moko. Ernie Fandler, ndeko mobali oyo auti na Suisse, alobaki: “Natelemaki mpe natikaki ete ékota malamú.”

160 Nalingi ete oyo ékota malamú.

. . . esika ya peto ezali te.

Mpamba te mesa nyonso ekotóna na kosanza. . .

Mpe ndenge mbwa ezongaka na kosanza na yango. . . mpe ngulu. . . na potopoto na ye, nde bongo bato bazali kopengwa.

161 Likambo nini ná bino ba-Methodiste? Bozaláká na Pole. Likambi nini esalemaki? Nzambe alongolaki Yango na maboko na bino, Apesaki Yango epai ya ba-Nazareen.

Eloko nini ekomeli bino ba-Nazareen? Bozalaki na Pole ntango moko boye. Nzambe alongolaki Yango na maboko na bino mpe apesaki Yango na ba-Pentekotiste. Ya solo. Bino église de Dieu ná bino baoyo botikali, bato ya bosanto, lokola boboyaki Pole, bomikómisaki denomination mpe bolobaki: “Tokondima eloko mosusu te bobele oyo,” Nzambe abimaki mpe akobaki kokende mpe alakisaki bino ete Azali na bato oyo balingaki kolanda Ye.

162 Eloko nini ekómeli bino ba-Pantekotiste? Bozalaki na Pole. Nzambe alongoli bino Yango.

Likonzi na Móto ekendeke liboso. Ntango nyonso oyo Likonzi na Móto ezalaki kokende, Lingomba ezalaki kokende elongo ná Yango.

Ntango Luther akómisaki lingomba na ye moko ebongiseli, nsima na kobima na lingomba Katoliko, Likonzi na Móto ekobaki mpe Wesley akendeke elongo ná Yango.

Wesley akómaki ebongiseli mpe asalaki denomination na ye, Likonzi na Móto ekobaki mpe ba-Nazareen bakendeki elongo ná Yango.

Ba-Nazareen bakómaki ebongiseli, mpe église de Dieu ekendeki elongo ná Yango; mpe balobaki ete bazalaki denomination te, kasi bazalaki yango.

¹⁶³ Bongo likambo nini esalemaki? Likambo oyo elandi, oyo esalemaki ezali ete, ba-Pantekotiste bamonaki Móto yango, mpe bakendeki liboso. Mpe bosalaki nini? Bosalaki malakisi uta na minoko na sika, mpe bokómisaki yango ebongiseli: “Bato nyonso basengelaki koloba minoko na sika, liboso ete bázwa Molimo Mosanto,” na nsima Nzambe alongwaki na Ye mpe atikaki bino na esika bozali.

¹⁶⁴ Eloko nini ekómelaki bino ba-Unitaire? Bomonaki libatisi, Nkombo na Yesu. Bosalaki malakisi uta na yango, mpe bokobwanaki na Oyo etikali, mpe Nzambe alongwaki na mbala moko mpe atikaki bino wana. Ya solo.

¹⁶⁵ Eloko nini ekomelaki bino Assemblée de Dieu, Likita Monene ya kala? Bosalaki ebongiseli uta na oyo ya bino, mpe Nzambe alongwaki na mbala moko mpe atikaki. Mpe sikawa botikali bobele etonga moko ya malili, ya milúlú, lokola baoyo nyonso batikali.

Mpe Likonzi na Móto ezali kokoba kokende. Aleluya!

. . . mesa nyonso etondi na kosanza . . .

¹⁶⁶ Bótala na Elambo ya Nkolo. Ee, kutu bango . . . Nazalaki na esika oyo baliaka ata lipa nini. Lipa yango esengeli kosalema na lipa lizangi mfúlu. Mpe bapesaka yango na basumuki, bameli makaya, bato na pité, basi ya ndumba, kaka mpo ba-nkombo na bango ekomama na buku.

¹⁶⁷ Mpe bino ba-Batiste kutu bobengaka yango elambo “ya kokangama”. Sasaipi, bino ba-Batiste boyulaka kelelo mwa moke, Nzambe akolongola kelelo na bino. Ezali mpenza bongo, bokozala na makoki ya koyula yango te. Elambo “ya kokangama”, omikaboli, lokola ete ozali mosantu koleka ndenge ozali.

Bóbosana te, oyo ezali tabernacle ya ba-Batiste. Yango nde oyo bozwi, bomikómisi ebongiseli. “Oh,” okoloba, “tozali ebongiseli te.” Iyo, bozali bongo. Na ntembe te, bozali bongo. Okoloba: “Tozali na boyokani kati bandeko.” Iyo, mpo na moto nyonso oyo akotaka na ekuke mpe alakisaka ndenge bondimaka yango, ezali malamú. Kasi, ye, bo—bokobwaka ye libanda te, kasi bokobimisa ye libanda na bondeko na bino. Ezali mpenza ya solo. Oh, bozali na lolenge ya kosaláká yango. Nzambe azali na lolenge ya kosaláká yango. Kasi Lingomba na Nzambe ekokoba kokende liboso. Likonzi na Móto ekotelema te mpo na yango.

. . . mesa nyonso etondi na kosanza . . .

168 Sikawa bóyoka. Sikoyo likambo oyo ekokamwisa bino kaka miniti moko. Bóyoka. Nakotanga Liloba. Oyo azalaki nani? Mosakoli, Yisaya.

. . . *mesa nyonso etondi na kosanza* . . . boye eloko moko te *ezali peto*, kaka mbwa aswi mbwa.

169 Toyei na losambo: basi bazali kokaka, kokata nsuki na bango, kolata bakupé, kobima mpe kotala mibali kotamboláká na balabala; kokata pelouse na lopango, bilenge basi balingaka ete bábélela bango ndenge babengaka ba-mbwa to ba-bulldog, to soko nini, boyebi: “Fiee-fiuu!” Oh, okanisi ete ozali kitoko, boye te?

170 Mpe bino mibali botambolaka na balabala, ná likaya ya monene na monoko, mpe ozali mosungi na likita. Ozali lokola ngombe ya Texas oyo balongólá maseke. Bongo okanisi ete ozali moto monene. Ezali mpenza bongo. Kokamwa te, bamesa nyonso . . . opusanaka mpo na kolia elambo, kasi osalaka lokola ete ozali moto monene, mpe obúbaka, oyibaka mpe okosaka, na mposo mobimba. Likambo nini ná bino?

. . . *mesa nyonso etondi na kosanza* . . .

171 “Oh, naliaka Elambo ya Nkolo. Ya solo, tosalaka yango na losambo na biso. Yesu alobaki ete Akosekwisa biso na mikolo ya nsuka soki toliaki Elambo ya Nkolo.”

172 Kasi: “Ye oyo akolia mpe akomela na motindo mobongi te, akomiliela mpe akomimelela ekweli, soki tososoli nzoto na Nkolo te. Na ntina yango nde mingi bazali na bokono mpe na bolembu kati na bino, mpe mingi bakufi,” mangomba ekúfá, mpe ya lolenge ya libanda. Molimo ya Nzambe esili kobima kati na bino. Likonzi na Móto ezali lisusu kuna te. Boanganaka lobiko na nzoto kouta na Nzambe. Boanganaka lisekwa.

173 “Oh,” bokoloba, “oh, Asekwaki kati na bakufi, kokokana na histoire.” Boye, bolobi nini mpo Azali lolenge moko lelo, soko Asekwaki kati na bakufi? Okoloba: “Oh, ezali bongo te.” Sikawa, yango mpenza. Bozali na lisekwa na ndenge na bino, mpe Nzambe azali na yango na ndenge na Ye.

174 Kasi, likambo ezali ete, Biblia elobi, oyo toyebi ezali Solo, ete Akotatola Liloba. “Mpe makambo oyo Nazali kosala, bino mpe bokosala yango. Mpe Nakozala elongo ná bino ntango nyonso, kino nsuka ya mokili.” “Yesu Klisto motindo moko lobi, lelo mpe libela.” Yango nde oyo Liloba elobi.

175 Sikawa, sabata ezali nini?

. . . *mesa nyonso itondi na kosanza* . . . moko te *epetwi*.

Akolakisa boyebi na nani?

Boyébi ya mokili te; boyébi ya molimo!

Akolakisa boyebi na nani? . . . akosolisa . . . malakisi na nani?

176 “Oh, Nzambe ápambolama, ebongiseli na biso endimaka Oyo te. Bakolinga koyikela Yango mpiko te.” . . . ata soki ebongiseli na bino endimaka nini. Liloba na Nzambe elobi nini mpo na yango? “Oh, ee, bakengeli na biso, boyebi, batángá.” Oh, toboyi te. Ya solo, batángá mingi, na lolenge ete batíká Nzambe libanda na yango. Ya solo, mpo okoki koyebisa bango Liloba kasi bakoleka na bango pembeni mpe bakoloba: “Ee, nandimaka Yango ndenge wana te.” Oh, yo eloko na goigói oyo! Tika náyebisa yo.

177 Bótala awa.

. . . akoyebisa malakisi . . . na nani? baoyo bakilísami libéle, mpe . . . baoyo balongolami na konúnga, mpe balongolami na mabéle.

178 Mokolo mosusu, mozalani na ngai moko ayaki. Alobaki: “Billy, mobateli moko awa na engumba, moto ya malamumu koleka oyo otikalá komona. . . .” Alobaki: “Ngai mpe mwasi na ngai tofandaki ná ba-pijama na nzoto, pene na minwí, mpe elenge mobateli yango ayaki mbangu mpe a—a—amelaki kafé elongo ná biso mpe akendeki na ndako ya mozalani mosusu, mpe apesaki bango mbote ya loboko. Bango bazalaki kobeta mwa lisano ya kalati, ye mpe afandaki mpe abetaki kalati elongo ná bango.” Alobaki: “Oh, azalaki elenge mobali oyo ayebi kofanda na bato mpenza.” Alobaki: “Oh, tolingaka ye. Tokolinga ata moke te kokabwana na ye.”

179 Nazalaki wana mwa moke, namilobelaki: “Bongo?”

180 Alobaki: “Oh, okanisi te ete lingomba nyonso esengeli na moto ya ndenge wana?” Ha! Nakokaki koyanola na yango te. Alobaki: “Na mwa esika mosusu,” alobaki, “bazalaki na esika moko kitoko mpenza. Motei yango ná mwasi na ye, bato malamumu, bakendeki kuna bakómaki kosunga bana mpenza na lolenge ete basalaki e—eteyelo ya Biblia.” Mpe alobaki: “Bazalaki mpenza na bana mingi, na lolenge ete mwa esika yango etondaki na bana mike.” Alobaki: “Oh, ayebi mpenza kobetela bana mike mwa masolo ya ndenge na ndenge.”

181 Nalobaki: “Ezali malamumu. Ezali mpenza malamumu mingi.”

182 Nazongaki. Nautaki kokóma, nautaki na Canada. Namilobelaki: “Tala ngai oyo. Mawa! Bato. . . Likambo nini ekómeli ngai? Ngai nasalaka bongo te.” Nakendeki kosukola motuka na ngai. Namilobelaki: “E Nzambe, nabandi kokóma mobangé, mpe ngai oyo. Nabundaki. Nalélaki. Nasengaki na kobondela. Mpe nyonso oyo nazwi ezali litúki monene.”

183 Eloko ata nini, moto áloba eloko moko ya mabe mpo na yo, ezalaka kaka: “Oh, mobange motuntuki moko boye,” eloko moko ya ndenge wana.

184 Nazalaki kokanisa na ntina na yango. Mpe Mongongo moko eyaki epai na ngai, elobaki: “Mpo na bato wana, ezali malamumu

soko bazali kosala bongo, kasi Natikálá kobenga yo te mpo ósala bongo. Nabengaki yo mpo ózwa Mopanga mpe ótelema wana lokola Yosua mpe óbeta móndengé, ndeko. Ezali te mpo ólekisa ntango ná bato moko boye to ná lingomba moko ya ebongiseli, kasi óbeta móndengé na zabolo. Telema na ndelo ya etumba, benga malamú malamú, mpe mabe mabe. Teya Liloba mpe luka moto oyo azali na kondima mpo na kondima Yango. Sakola yango polele.”

¹⁸⁵ Nakómaki kosala mbangu na motuka wana, kosukola yango noki-noki. Nalobaki: “Matondi, Nkolo. Matondi, Nkolo.” Bongo nayokaki malamú. “Ezali likambo te, Nkolo, nakosimba yango mwa makisi koleka, mpe nalingi kokufa na Yango na loboko na ngai.”

. . . nani nakoki *kolakisa* ye *malakisi*? (Bóyoka.)

. . . *mesa itondi na kosanza* . . .

. . . *baoyo balongolami na mabéle, mpe bakilisami mabéle.*

Sasaipi bótala.

Mpo ete lilako lokola oyo wana nsima—nsima na lilako, lilako nsima na lilako; . . . molongo nsima na molongo; moke awa, mpe moke kuna:

Mpo ete na bibebu na bapaya mpe na minoko mosusu nde Ngai nakoloba na bato oyo.

Epai na nani nde elobamaki ete, Oyo ezali sabata na kati na yango bokosala ete baoyo ya kolemba bapema; . . . oyo ezali bopemi: atako bongo bakoyoka te.

Mpo liloba na NKOLO eyaki epai na bango (Moto moko ateyaki Yango.) lilako nsima na lilako, . . . nsima na lilako; molongo nsima na molongo, . . . nsima na molongo; moke awa, mpe moke kuna; ete bákoka kokende, mpe bázonga nsima, mpe bábukana, bákangama na motámbo, mpe bazwama.

¹⁸⁶ Bopemi ezali nini? Bopemi eyaki ntango nini? Ntango bato balobaki minoko mosusu mpe bakómaki na bibebu ya kolengalenga. Bibebu ya kolengalenga; balobaki eloko moko te. Bazalaki nde kobeta monoko. Esalemaki ntango nini? Na Mokolo ya Pantekote, ntango Molimo Mosantu eyaki. Yango nde Bopemi: Molimo Mosantu. Yesu alobaki: “Boya epai na Ngai, bino nyonso oyo bolembi mpe bomemi mikumba, mpe Nakopesa bino Kopema. Nakopesa bino Bomoi, Bomoi na Seko,” Zoe, Bomoi na Nzambe Ye moko. Nzambe akokota kati na yo mpe akokóma eteni na yo. Akopesa yo mbotama mpe akokómisa yo mwana mobali to mwana mwasi.

¹⁸⁷ Sasaipi bótala. Oyo wana ezalaki bopemi ya misato oyo Apesaki. Ya liboso: Nzambe azwaki yango, nsima na mosala

na Ye. Ya mibale: Yisraele bazwaki yango, kati na mobeko. Ya misato: Lingomba ezwi Yango, lokola eteni ya Nzambe.

¹⁸⁸ Misato ezali motango ya bomoi. Bato boni bayebi yango? Mbala nyonso okomona misato, ezali bomoi. Bótala, ntango Nzambe akelaki mokili, na mokolo ya misato, ezalaki bomoi. Bato boni bayebi yango? Mokolo ya misato. Bomoi eyaki na mokolo ya misato ya bozalisi.

Bosato bosantu: Tata azalaki likoló na bato, kati na Likonzi na Mító; Mwana azalaki Moto, Oyo asololaki na bato mpe alengelaki bango; Molimo Mosanto ezalaki litambé ya misato, elingi koloba Molimo Mosanto, Nzambe kati na bato. Bomoi! Tata, Mwana. . .

Bopemi ya Nzambe; bopemi ya Yisraele; mpe Bopemi ya Lingomba, kotósa sabata.

¹⁸⁹ Na bongo, soki otikálá kozwa Molimo Mosantu te, otikálá kokóta na Bopemi ya Nzambe te. Ozali na ntina te ya koloba: “Oh, nakokoka te. Nalingi komela likaya. Na—nakoki mpenza kosala yango te; nazali Moklisto. Nalingi mpenza komela masanga te, kasi nazali Moklisto. Nakoki mpenza te, nalingi mpenza komela masanga te, kasi ata bongo Nalingi yango.”

¹⁹⁰ Soki olulaka basi, soki osalaka makambo ya mbindo nyonso wana, naino okómi na ntango ya Bopemi wana te. Otikálá kokota na Bopemi na yo te.

¹⁹¹ Mpe soko okoti na Bopemi oyo, opemi na misala na yo moko ya mokili, ndenge Nzambe apemaki na oyo ya Ye. Mpo na nini? Ozali eteni ya Nzambe. Ozali kopema, Seko-na-Seko. Yango mpenza. Yango nde Sabata. “Bóya epai na Ngai, bino nyonso oyo bozali na mitungisi ya mosala.”

Lelo, ye abongisi *mokolo moko, . . . nsima na ntango molai mpenza*, kati na Dawidi; . . . *ntango boyoki mongongo na ye, bóyeisa mitema na bino makasi te.*

¹⁹² Náloba liloba moko to mibale mosusu awa sikoyo, tokosilisa.

Mpo ete ye oyo asili koingela na epemelo ya Klisto, . . .

Boya epai na ngai, bino nyonso oyo bozali na misala makasi mpe. . . mikumba ya bozitó. . .

. . . bosili kotika misala na bino moko, ndenge Nzambe asalaki uta na oyo ya ye, na mokolo ya nsambo.

Ntango mosusu oyo ya yo ekómi na mobu ya ntuku misato, mobu ya ntuku minei, mobu ya mitano, to soko nini. Opemi na misala na yo, ndenge Nzambe apemaki na oyo ya Ye, mpo na Libela. Ozali lisusu na mposa ya makambo ya mokili te. Mokili esili kokufa mpo na yo.

¹⁹³ Sikawa, molongo ya 11 sikoyo, bóyoka na bokebi.

Tika tosala na bongo mosala mpo ya koingela na bopemi yango, (na oyo te, na oyo te, kasi na Oyo), ete

moto moko te akwea na ndakisa yango moko ya kozanga kondima.

194 Ezali nini? Likonzi na Móto ezali awa. Mwanje na Nkolo azali elongo ná biso. Azali kosala makambo yango moko mpenza oyo Alobaki ete Akosala. Mpe bato bazali kobeta libaku, koloba: “Oh, ee, nabanzi ete Ezali mabe te. Ezali malamau mingi. Oh, nabanzi ete Ezali malamau.” Bókeba mpo bókwea na motambo yango moko te, ya kozanga kondima. Bózwa Yango ná motema mobimba.

195 Bótala malamau.

Mpo ete liloba na Nzambe (malakisi ya lingomba te), liloba na Nzambe ezali makasi, na nguya mingi, . . . na mopotú koleka mopanga mopeli na bipai bibale, (bóyoka), ezali kotobola kino . . . ekabwelo nyonso motema mpe molimo, . . . matongi, mpe lilongo, mpe . . . (boyoka), mpe ezali moyebi ya mposa mpe makanisi mpe mikano ya motema.

Ezalaki nini? Molimo Mosantu ekoki koya koloba: “Osalaki likambo *songolo-pakala*. Mpe osalaki oyo mpe osalaki oyo *kuna*. Ozali na bokono ya lolenge oyo, mpe oyo *kuna*. Soki obongisi likambo oyo, okosala oyo *wana*.” Bomoni? Kososola makanisi.

196 Mpe bato balobaka: “Ezali nini? Malamau, ezali telepathie ya bongó. Ee, ezali . . . Azali moto na solóka.” Bomoni oyo nalingi koloba? Ezali mokili ya nkanza mpe ya ekobo oyo eyebi Nzambe te.

197 “Ezali na bomoi, na makanisi, na nguya mingi, kolela mopanga mopeli na ngámbo nyonso mibale, mpe esosolaka makanisi mpe ba-mposa ya motema.”

Sasaipi, eloko nini eyebaka ba-mposa ya motema? Nzambe. Olobaki: “Ee, Biblia elobi: ‘Liloba na Nzambe.’” Liloba na Nzambe ezali Nzambe.

Na ebandeli azalaki Liloba, . . . Liloba azalaki elongo na Nzambe, mpe Liloba azalaki Nzambe.

Mpe Liloba akómaki nzoto, mpe afandaki elongo na biso, . . .

198 Nzambe asosolaka makanisi. Abraham apesaki mokongo, Nzambe mpe—mpe apesaki mokongo na Ye na hema. Mpe Sara asekaki. Kasi Nzambe abalukaki, alobaki: “Eloko nini esekisi Sara?” Asosolaka makanisi ya motema! Nalingi ete ékota mwa ndambo.

199 Na nsima, ntango lotómo ya ndenge wana eteleme, oyo Nzambe alakaki mpo na ntango ya nsuka, likambo nini esalemi? “Telepathie ya bongó.”

200 Bango babengaki Nkolo Ye moko “Belezebula” te? Alobaki: “Soki babengaki Mokolo ndako ‘Belezebula,’ koleka boni bakobenga bayekoli na Ye?”

²⁰¹ Nalingi bino. Elakisi ete ezali na ntina mpo na bino, bozali na ntina te ya koya ndako oyo ezali na mopepe ya malili mpo na koyoka Nsango-malamu. Bozali mpenza na nzala mpo na koya na esika ya boye. Nzambe apesaki biso bobele nzela ya kotonga ndako oyo. Tolingaka yango boye. Bobele mwa ndako moke ya kala, kasi ndenge wana nde biso tolingaka yango. Nzambe afandaka na esika ya kitoko mingi te. Nzambe afandaka kati na komikitisa. Tolingaka yango boye. Tozalaka na esengo ya koya, ná bino mpe, kofanda na e—esika ya boye. Ata soko molungé ezali ndenge nini, ata soko ozali kotoka na kazaka na yo ya sika, na robe na yo ya sika, ekosala eloko te.

Ozali koyoka Bomoi na Seko, Liloba na Nzambe oyo eyebaka makanisi ya motema na yo. Likonzi na Mító oyo ezalaki likolo na bana ya Yisraele, ezali awa na mpokwa oyo. Nakoki kobeta móndengé mpo na yango: moto moko te akoki kotelema awa, na nsé ya nguya ya Molimo Mosanto, kozanga ete Nzambe átalisa makambo na ye nyonso mpe áyebisa ye oyo ye azali. Ya solo. Yango mpenza.

²⁰² Ezali nini? Ezali Nini? Ezali bobele Molimo moko oyo ekambaki Bana ya Yisraele na kopema na bango, mpe bakweaki mpo na kozanga kondima. Kokweya te. Oyo nde libaku malamu ya nsuka. Tata, Mwana, mpe Molimo Mosantu, Bomoi eyaki na nzela wana.

²⁰³ Kolongisama, Martin Luther, ezalaki naino lolenge ya kosambela. Kobulisama... Martin Luther; John Wesley; libatizi ya Molimo Mosanto, Bomoi. Kolongisama, ezali kondima; kobulisama, ezali kopetolama; Molimo Mosanto, ezali kotondisama, Bomoi. Na eleko ya ba-Lutherien te; bazalaki na Yango na lolenge moko boye. Na eleko ya Wesley te; bazalaki na Yango na lolenge moko boye. Kasi oyo ezali eleko oyo Molimo Mosanto Ye moko ayei.

²⁰⁴ Mpe soko naino ozwi Yango te, ndenge nini, ndenge nini okoki kondima bikamwa? Esengeli ete Nzambe ázala kati na yo, mpo óndima. Bokosala lokola Nzambe. Bokoyeba lokola Nzambe. Bokokanisa lokola Nzambe. Biblia elobi ete bozali “banzambe” ya mike. Yesu alobaki bongo. Mpamba te, bozali eteni ya Nzambe.

Kaka ndenge ngai nazali Branham ya moke, mpe yo ozali soko nani ya moke, mpo baboti na yo bazali na nkombo yango. Ndenge ozali, ezali mpo baboti na yo bazali bongo, mpo bango nde babotaki yo.

Mpe ntina oyo bondimi Nzambe, mpe ondimaka bikamwa, bilembo mpe bikamwa, ezali mpo bozali bana-mibali mpe bana-basi ya Nzambe. Bozali koyamba Bomoi. Bomoi eyaka na esika ya misato. Malamu.

²⁰⁵ Ntango Yesu akendaki likolo na ngomba, bisika nyonso Azalaki kokende, Akamataki Petelo, Yakobo ná Yoane, batatoli

misato. Misato ezali motango ya Bomoi. Bososoli yango? Bolingo, esengo, kimia.

²⁰⁶ Sikawa, tokende noki-noki sikawa na suka ya mokapo, noki-noki, wana tozali kotánga.

Mpo liloba ya Nzambe ezali na makasi mpe na nguyua mingi. . . koleka mopanga mopeli bipai mibale, . . . mpe ezali kokundola ata mikano ya motema.

Ata ekelamu moko te ezangi kotalisama na miso na ye: kasi biloko nyonso ezali. . . polele na miso na ye oyo tosendeli kosala liboso na ye.

²⁰⁷ Ndeko, ata nzinzi moko te ekoki kokita na likonzi oyo kuna, kozanga ete Ayeba yango. “Makambo nyonso ezali polele.” Ndeko, Ayebi makambo nyonso oyo osilá kosala, makanisi nyonso oyo osilá kokanisa. Yango nde oyo Ye azali. Tondimaka Ye ndenge wana.

Mpe ntango Nzambe akoti kati na biso, mpe atii biso kati na Lingomba, Atiaka makabo mpe makambo kati na Lingomba, mpo na kotalisa Bozali na Ye. Soki Nzambe azali Nzambe oyo azangi nsuka, na bongo Abikisaka babeli. Akoki kosekwisa bakufi. Akoki kopetola bato ya mbala, kosala ete bakufi miso bámona. Akoki kopesa bimónoneli. Akoki kosala makambo ya ndenge na ndenge, kosala kati na Lingomba na Ye, mpo ezali Nzambe kati na bino. Yango nde Lingomba.

²⁰⁸ Lingomba yango ekómaka Lingomba ndenge nini, na kokotáká na Yango? Te, misie. Na kopesáká mbote ya loboko? Te, misie. Na libatisi ya mai? Te, misie. Na kokóma mondimi ya lingomba? Te, misie. Bazwaka Yango ndenge nini? “Mpo ete na nzela na Molimo moko, biso nyonso tobatisami kati na Nzoto moko.” Yango mpenza.

²⁰⁹ Baloma 8:1.

Yango wana sasaipi kokweisama ezali te. . .

“Kokweisama ya mokili ezali te.” Bakoki kofunda yo na likambo moko te.

Kokweisama ezali. . . te mpo na baoyo bazali kati na Klisto Yesu, baoyo bakotambola na bizaleli na nzoto te, kasi na bizaleli na Molimo.

²¹⁰ Yango mpenza. Ndenge wana nde bokoyeba Boklisto na bino. Ndenge wana nde okoyeba ete osili kokota kati na Bopemi yango, mokili ezali lisusu kotungisa yo te. Solo mpenza. Soko omoni yango, okimi yango. Ozali na eloko epusi malamumu oyo okoki kokanisa. Yango mpenza: “Kokweisama ezali te.” Ndenge wana nde bakotaka na Nzoto.

²¹¹ Mpe obatelami: “Mpo na Libela.” Biblia elobi bongo. Bótala awa na Baebele, mokapo ya 10. Alobaki:

Mpo epai makabo ya ngombe mpe mbeka ezali, ekaniseli ezalaki mpo ya lisumu mobu na mobu.

Kasi moto oyo, . . . na nzela na mbeka moko bobele . . .

Nkombo na Ye ya bulee épambolama!

Mpamba te na mbeka bobele moko asili kokomisa na bobongi be mpo na libela . . .

212 Aleluya! Mpo na mayangani ya kolamuka oyo ekolanda te, kasi mpo na libela. “Makambo ya kala esili koleka; mpe makambo nyonso ekómi ya sika.” Tokómi kotambola kati na Pole, Pole kitoko. Bandeke bakómi koyemba ndenge mosusu.

213 Oyo afandi kuna, nazali kotala elenge molangwi masanga oyo, eleki pene na mibu mitano, nabanzi. Rosella, molángwi masanga ya somo, azalaki kotambola na babalabala ya Chicago, alángwaki, kodendadenda, kokweya na masumu ya ndenge na ndenge, molángwi masanga mpe nyoso wana. Na mpokwa moko, Molimo Mosantu, oyo azali na bomoi mpe na nguya mingi koleka mopanga oyo epeli na ngámbo nyonso mibale, alobaki: “Mwasi, ozali molangwi masanga.” Aleluya! Soko wana ezali Nzambe yango moko te, oyo azalaki kuna kala, oyo ayebaki ete Sara asekaki nsima na Ye, nayebi te oyo Ye azali.

214 Kuna na losambo, epai ya elenge mwasi mosusu, oyo akendeki kozwa, mpe komema wana, Alobaki: “Omelaka drogue.” Asosolaka mpenza makanisi ya motema!

215 Mpe batei minene ya lokumu bafandaki wana, oyo bapalanganisaka Nsango-malamu na mokili mobimba, bakangaki maboko, na ba-T-shirt, bazalaki kokanisa ete toyebaki bango te, lokola ete bakokaki kofanda na liyangani moko ya ndenge wana, kozanga ete Nzambe ámonisa oyo bango bazali. Bafandaki wana, komonanáká ndenge mosusu, lokola ete bazalaki bato mosusu. Molimo Mosantu ayebaki oyo bango bazalaki. Mpe bafandaki wana, na mitema na bango, bazalaki kokanisa ete Ezalaki telepathie ya bongó. Bayebi Nzambe ata moke te, ndenge Hottentot ayebaka butu ya Ezipito te. Ya solo. Bayebi Yango na nzela na mokanda, kasi na Molimo te. “Mokanda ebomaka, kasi Molimo epesaka Bomoi.” Ezali yango. Yango nde likanisi. “Bomoi, na nguya mingi koleka mopanga epeli na bipai mibale, Esosolaka makanisi ya motema.”

216 Bóyoka. Bótala malamumu.

Ekelamu ata moko te ezangi komonana liboso na ye: kasi nyonso ezali bolumbu mpe polele liboso na miso na ye epai na ye. . . oyo esengeli na biso koyanola.

Na bongo, komona ete tozali na nganganzambe mokonzi. . . (Bóyoka sikawa; mpo na babeli.) . . . oyo asili koleka kati na lola, Yesu Mwana na Nzambe, tika tosimba na etingia eyambweli na biso.

217 “Bosimba na etingia,” elingi koloba te kaka kokoba kotatola. Soko obiki bomoi te, osimbi yango na etingia te; ozali kobika bomoi ya bilongi mibale. Ozali. . . Malamu óbima mpe óloba ete ozali mosumuki mpe óbosana yango. Koyambola Boklisto na monoko te, bongo óbika ndenge mosusu; ozali libanga monene ya libaku oyo mokili etikala kozwa. Soko ozali mosumuki, ndima yango mpe, kende liboso, zala alimá na Nzambe. Soko ozali Moklisto, simba litatoli na yo makasi, tikala wana.

218 Bótala malamau likambo oyo sikoyo. Nalingi kosimba yango liboso ete tókende.

Mpo tozali na nganganzambe monene te oyo azangi kosimbama na bolembu na biso; kasi amekamaki na makambo nyonso lokola. . . biso, kasi akwei na lisumu te.

Bóyoka.

Na bongo tika ete toya na mpiko nyonso na ngwende ya ngolu, ete biso tokoka kozwa mawa, mpe kozwa ngolu mpe lisungi na ntango ya bosenga.

Nkombo ya Nzambe épambolama!

219 Bóyoka, ba-Batiste, ba-presbiterien, ba-Lutherien. Bokotuna ngai motuna oyo: “Abraham andimelaki Nzambe, mpe etangamelaki ye mpo na boyengebene.” Nayebi. Kuna nde epai bokendeke ntango nyonso. Ya solo. “Moto akoki lisusu kosala nini, soko bobele kondima Nzambe te?” Ezali mpenza ya solo. Yango nde nyonso oyo akoki kosala. Kasi ntango Nzambe akoyamba kondima yango, Akopesa yo Molimo Mosanto.

220 “Sikoyo násala nini, Ndeko Branham? Náganga?” Esengami te. “Náloba minoko na sika?” Esengami te. Okoki koganga mpe koloba minoko na sika, nyonso mibale, mpe kokóba kobika lokola mo—lokola mopakano, mpe kokóba kolula basi. Okoki kokóba kobenda makaya mpe komela masanga, mpe kosala nyonso mosusu. Namona bato koloba minoko na sika, mpe kokende mbala moko kosala mombongo ya mbindo koleka mpe ya mabe koleka oyo namóna. Namona bango kogánga, kolela na mpisoli ya ngandó, mpe koyiba nyonso oyo maboko na bango ekosimba. Namona bango kobima, mpe kobaluka mpo na kotala basi nyonso oyo bazali koleka na balabala. Ah-ha. Yango nde elembo moko ya malamau oyo elakisaka ete ozali na Yango te. Ya solo.

221 Kasi, ndeko, na ntango olongwe na kufa mpe oingeli na Bomoi, makambo nyonso wana ekomi ya kokufa, mpe okómi ekelamo ya sika kati na Klisto Yesu. Soki omoni eloko moko ya mabe, okobondela mpo na yango: “Nzambe yoka mawa.” Mpe soki omoni mikakatano, na esika ya kokende kotóngá, mpe ya koluka kobebisa yango lisusu, okoluka kokende epai ya moto yango mpo na kobongisa yango, mpe kozongisa kimia noki-noki. Wana nde Molimo ya Nzambe kati na yo.

222 Soki osali libunga? Okosala yango mingi. Soko osali libunga, okosembola yango noki-noki. “Kotika te ete mói élála na nkanda na yo.” Ndenge wana nde bayebaka ete osili kolongwa na kufa mpe koingela na Bomoi, ozali na bolingo, kimia, esengo, kosókema, boboto, bopolo, motema molai. Tozali na Nganganzambe Mokonzi oyo afandi na Lola, abelemi mpo na koloba na ntina na biyambweli na biso. Ezali nini? Ezali Yesu ntango azongaki na Logos, Likonzi na Móto oyo ekambaki bana na Yisraele, afandaki kati na Bozali ya liziba monene, monama ya ba-Pole wana oyo ebimaki, Milimo nsambo oyo ebongi be, Molimo oyo ebongi be ya bolingo.

223 Sikoyo bótala. Ya liboso ezali bolingo oyo *ebongi be*, ezali bolingo ya Nzambe, ya peto mpe oyo esangisami te. Oyo elandi yango, kuna, ezali bolingo *phileo*, ezali bolingo oyo ozali na yango mpo na mwasi na yo mpe bana na yo. Oyo elandi yango, nsima na oyo wana, ezali bolingo *ya bilulela*. Oyo elandi ezali bolingo *ya mbindo*. Mpe ekobi kokita kino na kokóma *bosoto*, ezali kokoba kopengwa, kopengwa.

224 Mpe eloko nyonso oyo ezalaki na ebandeli, ezali na nsuka. Mpe nyonso wana ekolongolama, mpe bokundoli na yango ekozala lisusu ata moke te, mpe tokozonga mbala moko na oyo ebongi be, mokolo moko. Mpe nzela bobele moko. . . Okoki kotelema awa te, na kati-kati ya nzela, mpe ómata kino *awa*. Osengeli kokóta mobimba, kotia motema, kopema na mobimba kati na lobiko oyo Yesu Klisto apesi yo, na nzela na kondima.

225 Molimo moko ya bosembo ezali, oyo eutaka na Nzambe. Yango nde liziba yango, liziba ya Nzambe. Ezali bosembo. Oyo elandi ezali, moto akosala “bolamu” mpo na mozalani na ye. Oyo elandi ezali mobali oyo “osengeli kotala ye malamú.” Oyo elandi ezali mobali oyo “azali moyibi.” Oyo elandi ezali mobali oyo “azali mobomi bato,” ná bondóki. Bomoni ndenge ezali kopengwa, na kokita? Kasi makambo nyonso wana ezali kotalisa oyo ya solo.

226 Yango nde ngai nalobaka. Ntango nyonso okomona moto oyo azali. . . Omoni mwa babalani kotambola na balabala, balingani, ntango mosusu bazali na mibu ntuku mwambe. Ezali kaka kotalisa ete na Lola, bilenge babalani moko bazali kuna, oyo bazali kotalisa bango, na Lola. “Soko mongombo oyo ya mokili ebebi, tozali na mosusu Kuna.”

227 Soko omoni moto azali kobuba, koyiba, kokosa, yeba kaka ete, eteni na ye ezali kozela ye na lifelo, ezali esika na ye, epai akotungisama Liboso na Nzambe mpe Banje ya bule, na móto mpe sufulu. Akotungisama kuna. Libela te, akoki kotungisama libela te, libela elingi koloba te ete na ntango nyonso. Seko ezali libela, Seko ezali. . . ezali na ebandeli to na nsuka te. Kasi *libela* ezali “ntáka ya ntango”. Biblia elobi: “Libela na,” likangisi,

“libela.” Yona alobaki ete azalaki na libumu ya mbisi-monene “libela.” Ezali ntaka ya ntango.

228 Kasi, bótala, Bomoi na Seko ezali bobele moko, mpe ezali nde Nzambe. Mpe soko okotungisama libela, mpe okoki kokufa te, ozali na Bomoi na Seko. Okoki kotungisama libela te. . . Okoki kotungisama na mibu milió mokama, Liboso na Nzambe mpe Banje ya bulee, na móto mpe sufulu. Nayebi te soko ebongisámá mpo na ntango boni. Kasi sukasuka esengeli kokóma na nsuka mpo ezalaki na ebandeli. Mpe bobele Nzambe nde azali na Bomoi na Seko. “Ye oyo akoyoka Maloba na Ngai, mpe akondima Motindi na Ngai,” azali na bomoi ya *libela* te, “azali na Bomoi ya Seko.” Bomoi oyo ebandaki, eloko moko te euti *awa*. Kasi euti na likoló Kuna, Bomoi ya Seko, *Zoe*, Bomoi ya Nzambe Ye moko ekiti mpe efandi kati na moto, mpe azali Seko elongo ná Nzambe, mpe akoki kokufa te. Yango nde oyo Liloba elobi.

229 Bókanisa naino yango. Bomoi ya Seko ezali nde mibale? Bokoki koyanola na yango te, boye te? Bomoi na Seko ezali bobele moko, mpe yango ezali Bomoi ya Nzambe. Bomoi ya lolenge mosusu oyo, ata soko ezali nini, ezali na nsuka na yango. Mpe eloko nyonso oyo ezalaki na ebandeli ezali na nsuka. Kasi eloko nyonso oyo ezalaki na ebandeli te ezali na nsuka te. Mpe Nzambe alobaki ete Akopesa biso Bomoi ya Seko, oyo ezali na ebandeli te, tokomisamaki kaka eteni na Ye. Mpe na solo, Bomoi oyo ezali kati na biso, eyaki awa na nzela na bomoto te. Bomoto epesaki biso molimo moko, kasi molimo yango ekúfá, mpe tozali na Molimo ya Nzambe. Nkembo na Nzambe!

230 Nzambe azalaki nde moto? Na ntembe te. “Tika Tózalisa moto na elilingi na Bisó Moko.” Nzambe azalaki nini? Theophanie, nzoto moko boye. Mpe kuna moto asalemaki ndenge wana mpe atiamaki mokonzi na elanga. Kasi moto azalaki te mpo ya kotimola mabelé, oyo azalaki na biyokelo. Na nsima Akelaki moto uta na putulú ya mabelé, na bomoi ya nyama, mpe moto yango akómaki kotimola mabelé. Mpe moto akweaki, na kobuka mobeko. Ya solo mpenza. Mpe Nzambe, Theophanie, akitaki mpe akómaki nzoto mpe afandaki elongo na biso, mpo na kosikola moto.

231 Boye, okoki kosala eloko moko te mpo na yango. Ozali mosumuki, mpo na kobanda. Osalemaki kati na lisumu na nko. Obotamaki kati na lisumu, oyaki na mokili ná lokuta na monoko. Obotamaki awa na mokili oyo na nzela na mposa ya nzoto na tata mpe mama na yo. Mpe osengeli mpenza kokende na lifelo, ata soko osali nini. Ntango mosusu okósa naino te, oyiba naino te; otosaka mibeko nyonso, mpe nyonso mosusu; kasi okokende na lifelo, ndenge ndeke oyo hirondelle ezongaka na zala na yango. Kasi nzela bobele moko, mpo ókoka kobika lisusu mokolo moko, ezali ete óyamba Molimo Mosanto, Bomoi ya Seko ya Nzambe.

232 Eloko nini esala yo oyo yo ozali? Na ebandeli, ntango Molimo Mosantu azipaki mabelé, eloko mosusu ezalaki te, bobele bamóto ya volcan. Mwa fololo moko ya Pasika ebimi. Nzambe alobaki: “Ezali kitoko. Koba bobele kozipa yango.” Bafololo ebimaki. Matiti ebimaki. Banzete ebimaki. Bandeke epumbwaki longwa na putulú. Banyama ebimaki. Mpe moto moko abimaki.

233 Sikawa, esalemaki ndenge nini? Kozipama na Molimo Mosanto esangisaki biloko oyo, potasse, calcium; esalaki bafololo, esalaki nyama, esalaki bino.

234 mpe sikoyo, ozali na bonsomi ya kopona. Nzambe azipaki yo lisusu, mpe Alobi: “Ozali koyoka Mongongo na Ngai? Koyeisa motema na yo makasi te, lokola na mikolo ya kotomboka.” Tala Ye oyo akiti, azali koteya Liloba.

“Nsango-malamu eteyami epai bango ezalaki te. . . ezalaki na kondima te kati na Yango, boye Esungaki bango te.” Bayokaki Yango, kasi bandimaki Yango te.

235 Nzambe akitaki. Alakisaki bango Likonzi na Móto. Alakisaki, na nzela na mosakoli na Ye, bilembo mpe bikamwa, Azalaki elongo ná ye. Bandimaki Yango te. Oh, bazalaki kolinga komona bikamwa. Bazalaki kolinga komona mosakoli yango. Kasi mpo na kondima Yango, bandimaki te. Bomoï na bango etalisaki polele ete bandimaki te.

236 “Sikawa,” Alobaki, “bokweya te na ndakisa moko wana ya kozanga kondima.” Mpo na ntango ya nsuka oyo, na lingomba ya Mabota, Nzambe amonani lisusu; elembo yango moko, ekamwiseli yango moko, Likonzi na Móto yango moko, etatolami, etalisami polele. Tóyeisa mitema na biso makasi te mpe tókwea na komekama ya kuna te, ya kozanga kondima, mpo tokopola na mabelé mpe ekosuka wana.

237 Mpe ntango Molimo Mosanto azali kobeta na motema na yo, [Ndeko Branham abeti eteyelo—Mok.] “Nsima na ntango molai boye, soko boyoki Mongongo na Ngai, bóyeisa mitema na bino makasi te.” Ezali koloba: “Mwana na Ngai, oyo ezali Solo.” Bótala motindami te. Bóyoka nde Nsango. Bóndima Yango. “Koyeisa motema na yo makasi te, lokola na mikolo ya kotomboka.”

238 Ntango ayoki Mongongo na Yo: “Koyeisa motema na yo makasi te.” Na nsima okoloba: “Iyo, Nkolo, nandimi.” Na bongo okoti kati na Bomoï, Molimo Mosanto akoti kati na yo. Molimo na yo ya kala ekufi, oyo esalaka ete ólula mpe óyina, na mayele mabe mpe bonguna, mpe—mpe koyina mpe makambo nyonso wana, ekufi. Mpe okómi moto oyo atondi na bolingo, esengo, kimia, bopemi. Ata soko mipepe epepi ndenge nini, nyonso ezali malamau.

Longo na ngai ekangami na kati ya ezipeli;
Na bikumbaki nyonso mpe na mopepe mokasi,
Longo na ngai ekangami na kati ya ezipeli.

Mpo likoló na Klisto, Libanga na makasi,
natelema;
Mabelé mosusu nyonso ezali zelo ya kozindisa.

²³⁹ Yango mpenza. Eddie Perronet, ye moto akomaki loyembo wana oyo eyebani mingi. Mabelé mosusu nyonso, badenomination nyonso, bindimeli nyonso, malakisi nyonso, ezali kolimwa. Klisto!

Okoloba: “Ee, nayebi Biblia.” Bazwaka Bomoi te na koyebáká Biblia.

“Nayebi katekísimo na ngai.” Bazwaka Bomoi te na koyebáká katekísimo.

“Ee, nazali Moklisto.” Bazwaka Bomoi te na kotatoláká Boklisto.

²⁴⁰ Bazwaka Bomoi na koyebáká Ye. Koyeba Ye, nde bazwaka Bomoi. “Bongo okoti kati na Bopemi na Ye. Opemi na misala na yo, ndenge Nzambe apemaki na oyo ya Ye.” Okómi mwana na Nzambe, mosangani na Nzambe. Mpe soki—soki Molimo Mosanto wana aseveli na yo, yo mpe sepela na Ye mpe loba: “Iyo, Nkolo,” to kolela ya ebenga.

²⁴¹ Kolela ya ebenga: “Boya epai na Ngai, bino nyonso oyo bolevi na misala mpe na mikumba. Nakopesa bino Bopemi.”

²⁴² Ah Mpe yo olobi: “Ah, nazali elenge. Nazali na... Oh, mobateli na ngai... Nyonso nasengeli kosala...” Bomoni? Okozwa Yango te.

²⁴³ Kasi soko olobi: “Iyo, Nkolo na ngai. Nayoki Mongongo na Yo. Nayeisi motema na ngai makasi te. Ata ndenge nini, Nkolo, Ezali Liloba na Yo mpe Nandimi Yo. Zwa ngai, Yesu, ‘Kaka ndenge nazali, nazali na eloko moko te, kasi Makila na Yo esopanaki mpo na ngai. Mpe kuna nalaki: “Nakondima.” E Mwana mpate ya Nzambe, Nayeisi.” Tia maboko na yo likolo ya motó na Ye ezali kokufa, loba: “Nkolo, nazali mosumuki, mpe Obengi ngai.”

²⁴⁴ “Bato nyonso oyo Tata apési Ngai bakoya epai na Ngai, mpe Nakosekwisa ye na mikolo ya nsuka.”

²⁴⁵ “Iyo, Nkolo, nayeisi. Nayeisi motema na ngai makasi te, lokola bato wana, na kotomboka, ngai nandimi mpenza.”

²⁴⁶ Bongo, Akosala nini? Akopesa yo Bomoi na Ye, Zoe, Bomoi na Seko. Mpe soko Nzambe akokaki kotelemisa biso longwa na putulu ya mabelé, epai toutá. . . Toutá nde na putulú? Nyonso oyo bomonaka, euté na putulú. Mpe soko Nzambe akokaki kokómisa ngai oyo nazali lelo, kozanga kopona; kaka mpo ete Asevelaki kosala ngai, mpe kopesa ngai libaku malamu ya kokutana na Kalvari mpe ya kozwa mokano; mpe nazwaki mokano mpe nandimelaki Ye; boni boni koleka Akosekwisa ngai! Soki Akomisi ngai oyo nazali, kozanga kopona, na nsima naponaki mpe nayambaki Ye kati na ngai; na bongo Atiaki

maboko na Ye na Ye moko, mpe akati ndai na Ye moko, ete Akosekwisa ngai na mokolo ya nsuka. Nakopema na elikia nyonso.

²⁴⁷ Nazali na Bopemi, ezali te mpo nakumbamelaka mokolo ya Lomingo, ezali te mpo nakumbamelaka mokolo ya sabata. Etali yango na eloko moko te. Nakumbamelaka mpo nasili kokota kati na kimia mpe Bopemi na Ye: kimia, bopemi, bolingo, esengo. Tika ete mipepe épimbwa; lóngo na ngai esimbi.

²⁴⁸ Obikeli nde likambo yango, na mpokwa oyo, moninga na ngai oyo ofandi awa na tabernacle ya molungé oyo? Oyaki mpo na koyoka ngai te. Te. Oyaki mpo na koyoka Liloba. Yoka, moninga na ngai.

²⁴⁹ Sasaipi soki ozwi naino Bopemi yango te, okoki kozwa Yango sika-sikawa. Ozali na ntina ya kopusana awa na etumbelo te. Fanda kaka na esika ozali. Zala sembo, mpe loba: “Klisto, loba na motema na ngai. Nayebi ete molunge ezali makasi. Na—napoli na motoki, natoki. Nazali mpenza mabe. Kasi, Nkolo, ya solo, nakoki nakotoka mpo na mpasi, koleka molunge oyo, liboso ete tongo étana.”

Mpe monganga akoki koningisa motó, koloba: “Ezali mpasi ya motema. Asili kokende.” Nsima na yango nini?

²⁵⁰ Na nsima nini? Ntango Buku monene ekofungwama, nsima na yango nini? Boyokaki loyembo wana, *Nsima na yango nini?* “Ntango baoyo baboyaki Nsango, baktotuna bango ntina, nsima na yango nini?” Nsima na yango nini? Bókanisa yango sikawa, na bozindo mpenza.

²⁵¹ Wana togumbi motó, tókanisa yango.

Ntango moto oyo azali koboya Nsango oyo na mpokwa oyo,

Baktotuna ye ntina—Nsima na yango nini?

Nsima na yango nini? Nsima na yango nini?

Ntango Buku monene ekofungwama, nsima na yango nini?

Ntango baoyo bazali koboya Nsango oyo na mpokwa oyo,

Baktotuna bango ntina—Nsima na yango nini?

²⁵² Tata na Likoló, oyo nyonso ezali na maboko na Yo sasaipi. Sabata ya solo yango oyo liboso na bato. Mwanje na Nzambe Ye oyo, mpo na mwa mibu eleki, Angulumu na mokili mobimba. Batioli ná bamosusu bamekaki kokweisa Yango. Kasi, mbala nyonso, Yo moko Otalisaka polele ete Ozali Nzambe.

²⁵³ Bato ya science ya mokili, mangomba ya mokili; bakufi nde miso, Nkolo? Ntango mosusu moto moko azali awa na mpokwa oyo, oyo akolinga komona lisusu, mpo na kokoba kotambola, kasi mpo na komeka Nzambe te, lokola na mikolo ya kotomboka; mpo na koluka komeka Ye te, na kozaláká malamú mokolo ya

Lomongo, to na kotosáká mokolo moko boye, to na endimeli moko boye, to na kozaláká mondimi ya lingomba moko boye. Kasi oyo akolinga kobima mpo na kokatama ngenga, na motema, mpe kozwa Molimo Mosanto. Mpe balingi Ye. Na kondima sikawa, bazali koluka koyamba Ye na mitema na bango. Bazali koluka kozwa ngolu elongo na Yo, Nkolo.

254 Oh, ntango mosusu balobaki minoko na sika. Ntango mosusu bagángáki. Bazali naino na nkanda na bango. Bazali naino na mayele mabe ya kala. Bazali naino kotóngá mpe koloba-loba, mpe kosala makambo oyo basengelaki kosala te. Balingi yango te, Nkolo. Bongo nini, ntango Buku monene wana ekofungwama, oyo elobi: “Bato ya ndenge wana bakokota na Bokonzi te?” “Yango wana, bóbona be, ndenge Tata na bino na Likoló abongi be.” Nyonso oyo ebongi be te ekokota te. Bazali nde kotia motema na mobimba, na mpokwa oyo, na oyo abakamaki na ekulusu? Soko te, Nkolo, tika ete báloba “iyo” bobele moko ya Seko sikawa.

255 Loba: “Nkolo, ngai . . . Natuntuki te, kasi nayoki Eloko moko na nse ya motema na ngai, Eloko yango ezali koyebisa ngai: ‘Nakoki kosala yango sika sikawa, na ngolu na Yo.’ Mpe nayambi Yo sasaipi lokola Mobikisi na ngai mpenza. Na—naboyi makambo nyonso ya mokili, mpe nalingi kokota na Bopemi na Yo. Mpe nandimi ete nazali kosala yango sikawa. Nandimi ete Molimo Mosanto azali kokotisa ngai na esika wana.”

256 Wana motó nyonso egumbami. Moto nyonso amíyoki bongo sikaoyo? Tombola loboko: “Molimo Mosanto azali sikawa kokotisa ngai na esika wana, epai nakotóngá lisusu te.” Nzambe ápambola yo. “Nakosala makambo yango te. Nkanda na ngai esili. Nakoki kobika na kimia, esengo mpe motema molai, banda sikawa mpenza. Nandimi ete Nzambe azali koloba na ngai sikawa, ete nakoki kosala yango kobanda na ngonga oyo, na ngolu na Ye.” Okolinga kotombola maboko? Nzambe ápambola yo. Nzambe ápambola mama madame. Moto mosusu azali? “Nandimi sikawa.”

257 Komeka Ye te, lokola na mokolo ya kotomboka. Bókanisa te lokola tokendeke na losambo mokolo ya Lomongo, to tosaka sabata. Paulo alobaki: “Bino baoyo botosaka mikolo to ba-sanza, to nini, nazali kobangela bino. Mobeko oyo ezalaki na elilingi ya biloko oyo ekoya, kasi elili mpenza ya eloko yango te, ekoki ata moke te kokomisa mokumbameli be.” Kasi Klisto abongisi bino be, be na miso ya Nzambe. Alongoli masumu na bino, alongoli bino kokweisama, Apesi bino bolingo mpe esengo na Ye.

258 Bolingi kokota na Bopemi sasaipi? Moto mosusu otomboli loboko, mpo na koloba: “Nasalaki makambo yango.” Nzambe ápambola yo, mama moke, awa na loboko na ngai ya mwasi. Nzambe ápambola mobali oyo afandi na loboko na ngai ya mobali. Kokota na Bopemi na Ye, bókanisa naino yango sikawa.

259 Bondela: “Bobele ndenge nazali, Nkolo, na eloko moko te; nazali na ntina te. Nazali na eloko te oyo nakoki kopesa Yo, bobele bomoi na ngai ya kala, ya mabe, ya masumu. Okoyamba ngai? Okopetola ngai? Okosilisa mpasi na ngai? Mpamba te, nalaki ete nakondima. E Mwana-mpate ya Nzambe, naye. Sikawa naye, nandimi ete sikawa nasili koleka longwa na kufa kino Bomoi. Mpamba te, kaka awa na kiti na ngai, nayambi Yo lokola Mobikisi na ngai mpe nayoki kimia na motema na ngai.”

260 Bato mitano batomboli maboko. Moto mosusu, oyo amiyoki ndenge wana, okolinga kotombola loboko? Soko ozali Moklisto te, yamba Ye sikawa.

261 Soki olobaka ete ozali Moklisto kasi naino okómi bongo te, ozali naino mosumuki, ata soki obiká bomoi ya—ya ndenge nini, to sok omekaka kosala yango yo moko. Oyo osalaka eyambami te. Ezali nde oyo Ye asalaki. Boyengebene na yo moko ekoyambama te. Soki otiki komela makaya kaka mpo olobaki: “Ee, malamu nátika komela makaya mpo nalobaka ete nazali Moklisto,” Nzambe ayambaka yango te. Soki otiki kolula basi, kaka mpo ozali koboya yango na makasi na yo moko, nzambe ayambaka yango te. Ezali eloko oyo yo osali. Oyo wana ezali misala. Ngolu nde ebikisaka. Nzambe ayei nde epai na yo mpe Alongoli nyonso kati na yo? Yango nde eloko oyo elandi.

262 Okoloba: “Nakotaki na lingomba, na bongo nasengelaki kotika makambo yango.” Nzambe ayambaki yango te, ozali na eloko ya kopesa te. Ayambaka kaka oyo Klisto apesaka. Apesaka yo Bomoi na Seko, mpe Alongolaka yango kati na yo. Okolinga koyamba Yango?

. . . kuna na mbu ya kotomboka, na ekumbaki,
Yaka, tia lóngo ya bomoto na yo kati na libongo
ya bopemi,
Mpe loba: “Molingami na ngai azali wa ngai.”
Nakangisi lóngo ya bomoto na ngai . . .

Malamu, bokoki kotombola mitó. Liteya esili sikawa. Tókumbamela Ye kaka sikawa.

Nakonana lisusu mbu ya kanza te;
Mopepe makasi mpe mbula ekoki kobeta na
ebale etomboki,
Kati na Yesu nabatelami libela.

263 Bisu nyonso sikawa, tókumbamela.

Nakangisi lóngo ya bomoto na ngai kati na
libongo ya kopema, (Sabata.)
Nakonana lisusu te na mbu ya nkanza;
Mopepe makasi mpe mbula ekoki kobeta na
ebale etomboki,
Kati na Yesu nazali nabatelami libela.
Ngenge ngai . . .

Mitika kaka. Kanga miso. Yoka Molimo ya boboto wana? Yango nde kokumbamela. Liteya esili. Oyo ekómi kokumbamela.

Tika ete Pole kouta na ndako ya pole éngengela ngai;
 Oh, ngengela ngai, E Nkolo, ngengela ngai,
 Oh, tika ete Pole kouta na ndako ya pole éngengela ngai.

²⁶⁴ Bato boni bazali komiyoka malamú mpenza? Botombola maboko. Molimo wana ya boboto mpe ya komikitisa, nde Yango.

Kozala lokola Yesu, kozala mpenza lokola Yesu,
 Na mokili, nalingi kozala lokola Ye;
 Na mobembo mobimba ya bomoi, longwa na mokili kino na Nkembo,
 Nasengi bobele ete názala lokola . . .

Bókumbamela kaka.



BAEBELE, MOKAPO YA MINEI LIN57-0901E

(Hebrews, Chapter Four)

MATEYA LIKOLO NA BUKU YA BAEBELE

Liteya ya Ndeko William Marrion Branham oyo, eteyamaki liboso na Anglais mokolo ya Lomingo na mpokwa, mwa 1, na sanza ya Libwa, na mobu 1957, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org